

光緒永城縣志卷五十四

詞章志

序

贈李封公序

明編修馬之騏

余舉南宮與公遠爲同門兄弟朝夕晤言耳太公行義甚悉太公游於詩書吐發春華與其弟中石侍御中白民部共硯席頡頏爭進取兩公後先矯朝而太公數奇不偶乃棄羔雉不修夷猶嘯傲亭亭物表嗒然忘其身世然內行醕篤大節卓爾事親色養極甘毳之奉撫季則怡怡友愛與人游不侵然諾間黨有競輒質成焉庶幾翔區外以寄

致涉人世而無慚者乎太公旣用道自尊而公遠復代行
其義啟封於曹於永止隔一衣帶水迎養至便終不欲以
車徒勞曹人之力三請甫一就仍諄諄命公遠倚恃百里
不可一毫偏頗失元元心有負天子付託之意用是公遠
治狀考最晉小司馬論辨材官所關軍國益重太公更戒
以立朝風義俾移孝爲忠公遠行誼至高而所受於過庭
者不少矣今太公春秋高公遠政適當報成載膺綸錫金
章光被可不謂榮焉騏與二三兄弟分在猶子可無一言
佐觴余上下古今人所豔於身外逍遙遊者則漆園之蒙
莊又所豔於表俗型時者則太邱長陳文範先生夫兩人

者一以放浪形以一以飭躬砥行其趨向雖殊然並在梁宋之墟太公世家在焉豈其興於其風哉今太公坐忘而機化太冲而天游偃仰林皋與海鷗相逐非蒙莊乎其居身雅操動爲人望卽文範先生何以加焉是漆園太邱合爲一人矣易曰鶴鳴九皋其子和之詩曰豈弟君子求福不回其吾太公之謂歟

送李雨蒼序

本朝侍郎方苞桐城

永城李雨蒼力學治古文自諸經而外徧觀周秦以來之作者而慎取焉凡無益於世教人心政法者文雖工弗列也言當矣猶必其人之可故雖楊雄氏無所錄而過以余

之文次焉余故與雨蒼之弟畏蒼交雨蒼私論並世之文
舍余無所可而守選踰年不因其弟以通也雍正六年以
建甯守承事來京師又踰年終不相聞余因是意其爲人
必篤自信而不苟以悅人者乃不介而過之一見如故舊
得余周官之說時輒其所事而手錄焉以行之速繼見之
難固乞余言余惟古之爲交也將以求益也雨蒼欲余之
有益也其何以益余乎古之治道術者所學異則相爲蔽
而不見其是所學同則相爲蔽而不見其非吾願雨蒼好
余文而毋匿其非也古之人得行其志則無所爲書雨蒼
服官雖厯歷著聲績然爲天子守大邦疆域十里昧爽盟

沐質明而涖事臨民一動一言皆世教人心政法所由興壞也一念之不周一物之不應則所學爲之虧矣君其併心於所事而於文則暫輒可也

王義士傳

明皇甫冲安定人

語云俠以武犯禁賈以貨害身二者皆非而君子有取焉者豈其能捐軀輕施赴人之急耶若夫捐軀而不犯禁輕施而不害身庇其民人國亦有利焉是又君子之所亟取也昔賈廣孝化華原魏彥威存海州固不以捐軀輕施亦孝友忠義不欺其志士之所以發憤而起者也仕者寄百里之社澤不下究卒遇變委之而不能顧其效死者無以

立功何足道哉由是知王海之義天下之所欣慕而願望
見者也海字大量其先山西陽城人商於永城因家焉居
韓家道口重孝弟尙義節尤喜博施濟物視人之饑寒若
取諸其懷而無不得者道口人皆德之號南王氏因北亦
有王氏族別之也正德辛未流寇起京師壬申春南奔雒
都城多破將帥率數萬眾操利兵莫之誰何道口人聞賊
至都欲奔海召眾謀之眾曰高城深池尙不足守吾輩守
此何爲請徙避之海曰無庸也築樓浚濠柵道欄截可免
矣眾曰資不具奈何海曰吾爲爾等辦之於是燭工構木
築望樓什伍相錯濠環之深可沒馬開道樹柵相鈞帶一

柵受敵左右尾救治授兵之家計口以廩之與之盟無一
奔心無何賊至周濂而望不能入海曰戰而勝可免也乃
謂子鯨曰非子不能守吾往矣鯨奮獨往出柵與賊戰稍
當飛石如雨略不動以張弓自蔽不能中賊懼麾其旗鯨
大此揮兵馳之道口人恐失鯨奮擊破之斬三首明日復
來攻生擒一首夜又令將死士突之散去明日益軍來攻
復破之道口解嚴宸姓賈海因問曰令器所以舍公與若
弟往者何也曰予不可以賊遺親且弟尙無息故死生身
以之眾益著其子之孝友順爲海死者三百餘人有司以
其事上總督彭公巡撫鄧公二公徵海會朱都統軍擊賊

海發橐金犒官軍於河又戒其子曰賊踰吾濠汝前勞盡
棄矣聞賊在豐遣義子洪五千騎破之又破於浦之溜溝
河還解趙圍圍賊潰二公表海功請爵之海辭不受二公
遁以天子命金幣勞海又辭不受退而隱於道口嘉靖壬
午益發山東巡撫何公聞海徵統招募鄉兵戰守如曩時
海復選其驍勇兩人從齎金百兩以犒官軍何公義之以
其事上聞部議榮以冠帶令得建坊於其里賜額曰好義
坊殊旨也昔弦高不惜十二牛之費魯連辭千金之賞彼
其志有所成而區區之功不足以動其中也時畀之疏爵
亦微矣使海有尊爵居邊守推道口之事而大之天子無

西顧憂可也

胡錦屏傳

明侍郎坤

坤

永城有慷慨剛直士曰胡錦屏者名格誠字中孚初號嗣溪母嘉魚縣主內鄉王女也王選佳婿得錦屏之父金以嘉靖壬辰八月十日生錦屏於大梁錦屏少與大梁諸生及宗藩戚里中之節槩任達者遊故其襟度曠邈蕭遠爽脫豪雄土苴勢利而糠粃塵寰世之猥鄙者柔澤者以資自雄者貲而倨者行無賴而負不義於鄉曲者皆白眼視之與同羣則望望然去曰若等汙人閒世我見輒欲嘔安可令人阿堵中刑弱冠入邑庠卽翹楚士林中嘉靖丁

已家君有永城田余往省之識錦屏於李內翰孺野家孺
野名良知丙戌進士今侍御楠己丑進士今刑部主政哲
之父也永城稱好友則言胡李兩君皆一世人豪平生歡
歎甚兩君與余傾蓋也亦歡歎若平生孺野爲余下榻而
錦屏於余抵足眠者彌月道義切磋情好細繆由然三姓
同胞云辛酉余與錦屏同舉於鄉而吾鄉得士十有三人
故事謁兵憲於陳州是時大司馬張崛嶮佳亂左遷陳州
倅署篆焉兵憲尊而崛嶮先達名士皆置酒禮諸生凡有
問諸生皆膝席磬折唯唯無一語錦屏獨侃侃應對如懸
河至談弭盜事尤切中兩公皆動色詫之曰鑿鑿哉斯語

我未之前聞也明日下所部議部皆心服如兩公錦屏明
練世務茲特露一班云永城自國初來無進士錦屏笑曰
天生胡嗣溪破此天荒耳乃作種桃者曰竟登隆慶戊辰
羅宗伯萬化榜進士授常州府推官讞決明允惟法無當
者不以一毫阿上官海剛峯瑞巡撫應天以儉質率屬公
移用連七單封諸司惟命錦屏用連四袂封海公怒曰奈
何格吾令對曰明公德令也宜承何敢格惟是推官職司
刑名爰書多重辟又無印鈐恐露墨蹟以啟奸僞公是之
當是時惟錦屏異封一時服其勁直張直指問明接三吳
直先訟後訟者即直莫之直也詞下錦屏錦屏惟曲直是

視有先訟者不情錦屏筆之三十坐誣先訟者憇曰胡某謂小人摹筆之六十直指怒駁之責錦屏對狀錦屏召其人復筆三十對曰是人也辭不讐欺推官責三十彼憇倍廷也今如數補之矣罪如初直指奪於理竟依擬而健訟之風自是亦稍稍衰焉考最績當拜諫垣以國氏子例不京除陞安慶府同知丁儀賓公憂服闋補西安西安劇同知職邊儲又劇兩院以其才也交委之勢不得兩先錦屏事兩院如在常州時由是交得罪交劾之曰同知慢無禮於司監當罷當事者知錦屏得左遷已卯冬候補銓曹余爲銓曹郎錦屏來余私寓因門者以通執履厯狀長跪報

謁余詫之曰兄奈何作此態錦屏大笑而起曰外吏見銓
曹自有故事十年睽隔吾試文有世味否乃猶然識故人
不俗不俗因造膝談事抵掌如他日卽躡足附耳語皆揚
眉吐氣發之時錦屏年四十九矣鬚髮皤然無一莖青蒼
色有獻烏鬚方者笑曰老子平日不作矯僞事使斥我者
以貌與年邪猶尙幸霍州守高烏辛酉同鄉舉也入覲病
疫染疾也人忌之高來自官從者皆吏卒僮僕病不能
命也從者亦不用命錦屏登牀執其手曰格誠在此兄無
慮召者數其慢笞焉高感卽泣問篋中物對高檢閱一一
籍記之乃延名醫檢方藥日夜扶掖調護無頃刻離蓋同

起卧者九日而高卒錦屏身爲喪主衣衾斂含棺木極其周厚曰送終千古大事也無令其家有悔心既而高氏子至慟哭曰傷哉吾父客死誰收女矣既啟殯視之又慟哭幾死曰孤不孝亡父無祿天不俾相永訣萬死奚贖亡父難言心事伯父以身託之孤子欲盡心力伯父以身代之羈魂何在無能名伯父德令不孝孤世世銜恩以頭搶地又慟哭幾死錦屏亦相與慟哭皆失聲乃持篋藏及喪費兩籍呼諸從者前指點明悉而付其子焉又謂其子曰二千里扶柩客路恐難汝不識一人奈何乃自署名爲賻狀告同鄉之在邸中者其辭有曰一束旅櫬有底冷竈寒燈

千里孤兒那不眠苦歎粥讀者酸鼻得轉數十金又引故
官例上狀銀臺例不得如請當事者義錦屏乃給長夫昇
輿歸焉時有誦錦屏義者錦屏曰長者爲行不使人知且
吾義不如原巨先奚足多哉調濱州判官署長清縣事在
郡邑皆有能聲歲餘陞任邱令任邱孔道也相沿夫馬視
前途旌旗鼓吹驛遞告疲錦屏至夫馬視勘合此外一夫
匹馬不加焉于宗伯穀峯時爲宮坊錦屏同年也攜家過
任邱幾不能行宮坊笑曰甯困頓我無令賢吏法自我壞
三輔御史常取所部名馬送都中知厚者乘之差滿不更
馬商直指爲正視學北畿會以任邱馬送少傅王公對南

對南時爲宮詹商行錦屏掣其馬以歸商不悅任邱河閒屬邑也商謂河閒燕太守好爵曰爲我語任邱一馬耳使我無顏於座上主人燕以告錦屏不從曰一馬一犧歲費民閒五十金今八差察院歲取任邱八馬饋所知代矣而馬不還繼者復取十年後任邱無馬矣宮詹我同年也已不能惠人與而復奪之此豈人情徇吾私以靡民財有死不爲也對南聞而高之曰直哉令任邱有民矣鹽直指督未急商鹽告滯罪任邱曰國民兩重商不之任邱矣如國課何逮其吏重笞之錦屏曰鹽一也官價倍私私土產也禁不得食而強派以商商獨赤子乎願解綬去直指好語

慰留之尋以不職論罷冢宰曰此強項令也終不容於要
路調閒散而錦屏亦自是懸車矣居鄉爲人作美不平者
就質盈門有陳太邱風惇友誼恤惄獨故友王文學可任
名士也死之日父八十餘矣子在孩提其妻日夜泣曰天
乎何以爲生錦屏往哭之旣謂其妻曰嫂氏無苦一切事
悉以見託乃與孺野經紀其家籍其歲入而節縮之數年
家益以饒又爲其孤問婦於丹陽張氏張富翁也不許錦
屏曰王氏子吾子之若與我爲婚又何辱焉乃許之六禮
皆兩兄終始人謂王君不死云錦屏性脫畧恥細謹便敏
活潑所至無戚容無拘態陶然嬉然神遊無懷之世而忘

在義皇之上機警多才大而兵食河漕小而琴書刻畫詩文賦誄詞曲鞠奕無不精能官人者用其所長得一當焉必能建卓犖偉績成跡弛奇功而困以簿書束之文法强其所不欲以就俗調譬之駕騏驥於鹽車淹鯢鯨於涸轍其不躊躇憤懣而死者幾希錦屏行實見尹別駕來師所爲狀乃入政以來表在士紳口吻者狀多未之悉也余摭所聞爲傳亦不悉隱俟能悉者悉之

李孝子傳

本朝賈開宗商邱人

李公諱支承字公紹童時患痞疾遇異人授丹藥服之立愈始就外傅治春秋毛詩每於訓註之外別有見解發前

人所未發公世父侍御公楠計部公哲從兄樞部公支揚皆以高第官於朝而公恥矜門闈以清節素風高自標持日奉其父文學公榮之教與弟支捷從兄支振及一時知名士相聚爲文於西郭佛舍諸人共爭雄長趨合風氣公獨取先輩大家之文行以己意不問毀譽得失也其時所推重者無如宋公屺而屺心伏公之所學兄事之未幾文學公以中風癱瘓卧床褥公遂罷業侍左右飲食藥餌親嘗後進病少間文學公曰兒以我病廢業業則不成公對曰人所最重者行誼不侍父而徒學所學之謂何古人不以三公易一日之養但能吾父無恙兒願布衣終其身文

學公泣下沾襟曰有兒如此吾復何憂公數年無少怠常夜焚香籲天祈以身代文學公竟不起公哀毀骨立不飲酒不茹葷不入室者三年由是絕意仕進篤志養母構別墅蒔花竹與友人歌謡飲奕於其中廩子弟以勤儉族性有陰侵其房址雄霸其蓮沼者公坦然一笑而已人莫不稱公長者崇禎辛巳卒年四十九病革謂其子廢齋曰善事祖母代我而子養不克終之恨如何可言噫生死惟念其親公真孝子哉

子瓊王君家傳

王連瑛

余兄子璫諱連琨號梅園長璫四歲少同受書先贈君孝

廉公崇禎癸未始就外傅永城卽爲叛弁所據城破家人來迎維時先君衣不蔽體顧獨載亂書二車以歸堆所居後敗室中余兩人檢其中成帙者聊復把玩但苦茫然不識字久之漸悟遂多讀無阻滯甲申秋杞縣馬布菴劉講山先生同過先君偶病令余兩皇子侍二公相與言古昔事或遺忘余兩人舉書中所有者爲誦之二公驚曰童子博通乃爾耶兩人遂廵謝因道其所得者是實出此但不知爲何書也二公爲指示若者爲史漢若者爲左國若者爲唐宋又大家童子第熟誦他日爲文必可觀適金陵賈至得所謂墨卷榜書者竊觀之率皆膚然卑下其高者往往

往用向所讀書中語余兩人乃竊喜自信時時擬爲之是歲皆補弟子員試輒高等辛卯秋闈余獲雋兄受知關中楊穎玉先生爲主司所抑置副車兄益發憤日夜不輟攻苦先君或中夜窗外竊聽歎且呵曰兒欲死於書耶兄滅獨俟先君寢則復讀至旦凡五年遂大病聞人急步聲悸而汗下作一文或經月不寐遂廢書凡應試不敢思索然信筆爲之輒冠一邑焉如此者十五年病稍痊兄念壯年卽不屑爲時文庸熟卑下者卽親摹震川庭門諸先上而識者益寡吾詎能逐時趨耶遂益市書上下古今無所不窺又念字學失傳後生相承謬謬日甚則取元文玉篇四

其貢頴會唐韻廣韻集韻類等，書日加考訂，繞室棟寒，
樹數百本。日哦其中，客至有所稱引，或未當。兄正色訓誨
之，而徐飲以酒。客初甚憚，久之油油然折服無間也。所著
文擬震川、鹿門者二百餘篇。穿石齋詩古文一卷。年五十
七，竟以明經卒。先是先君作家譜未就，命小子瑛踵成之。
因次兄平生爲之傳，以備家乘焉。昔蘇文忠死，弟轍誌其
墓，兄好學深思，固不啻文忠余媿。頴濱多矣。

任烈婦王氏傳

翁方綱大興人

王氏者，知天津縣事蕭縣任銜蕙之子。婦河南永城人。十
歲父鍾圮卒，哀毀如成人。十六歲母卒，號泣不欲生。其天

性純篤如此嘉慶九年十月歸任氏夫嵩齡邁疾歲餘以嘉慶十年八月八日卒年二十三王氏卽於其明日視歿畢閉目自經死年二十二當嵩齡卒時王氏恐傷翁姑心猶勉作寬慰語且飲食如常時使人不覺其欲殉也至時遣婢嫗出戶云倦思卧乃潛起以衣帶自經於室至歿時面如生大吏上其事於朝得

旨旌表蓋其矢死靡他志定於倉卒間竟得致命遂志以報所天貞烈之氣足千古矣

錄蕭縣志

光緒永城縣志卷三十五

詞章志

祭文墓銘雜體文

祭李孺野文

明呂坤

憶昔丙辰之歲余有連川之行初登龍門獲兄燕喜愧非
徐穉爲我陳蕃且念瑣尾之人未有呈身之日廣爲延譽
常招滿座之賓密與忠謀不恤羣小之怨知同管鮑義比
慶廉論文每至夜分談道忘其日昃曉言宿昔銘勒衷腸
至今凡五十年慕戀常如一日逮宦輪各去遂爲落葉之
分及後車同歸數有穀熟之約書以繼書宛若神情在眼

歲復一歲竟成雲樹傷心蓋河伯令兩地望洋思君成老
倘微軀不一朝溘露會面有時詎期薜荔溪翁便作芙蓉
城主訃聞爲位東望盡哀思極翻開報之書落月照當年
顏色垂老戀徘徊之夢殘缸話往日襟懷偃蹇衰齡迷茫
大塊星星老友落落孤吾恨不執繩相將無奈採薪爲病
嗚呼昔也赫蹠今也素疏昔也含笑折封今也橫波作誅
如何此別竟了生平極進柩停心送汝南之元伯魂來魂
去神交渭北之少陵會生平之淚於一腔畢永別之杯爲
三釂念余精意甯不來歟

自撰誌銘

宋主簿馬永卿

馬永卿字大年揚州人也南渡之後寓於信之鉛山因以家焉吾承父兄學登大觀三年科目亳州永城主簿至守達州凡厯六任積階至左朝散大夫吾性懶自號懶真子蓋嘗學矣而不及於古人蓋嘗仕矣而不及於今人矯矯亢亢似高而非高也跛跛挈挈似愚而非愚也有是二者所以仕宦四十年年逾六十而卒無所成時運已往矣乃退居於鉛山南溪之上因撰論語解十卷易拾遺二卷懶真子錄二十卷集十五卷以遺子孫吾世緣已盡今有一詩以示二子吾與汝等終天之別定在今年俟吾身沒汝等直書其後銘曰年十五知今知古終天之別實言告汝

義門曹氏世德墓碑

有銘

元
李文英

曹姬姓以國氏焉皇祖諱芸真定靈壽人五季漢代仕成
德軍兵馬使宋明道追贈魏王子彬字國華乾祐爲威德
牙將周上皇貴妃張氏乃從祖母也歸京師得隸世宗殿
下補供俸官遷引進使宋興以內客省使監歸德路行營
使升宣徽南院使復命討江南總領軍事及師還秦人請
頒政於朝詔諭詞臣紀功勒石於西鄙元祐間曹氏宗族
仕祿者二百餘人勅賜義門家傳曰太邱十六翁名諱未
詳先瑩在於鎮之西北里曰郭姑林建炎以來蕩無遺址
金正隆翁二子一曰辛生一子曰桐二曰誘生二子曰信

曰忠改葬於東南睢水之右遂爲在坊里人也嗚呼曹氏
之源其來尙矣曹氏自漢乾祐顯仕迄今逾四百年昭穆
相傳者由譜牒之力也十六翁七世孫曹誠等鳩諸族曰
吾等俱被祖蔭從容鄉里拜掃林邱或策名仕版或高卧
田園非上世流澤烏能至此耶當樹豐石以圖永久焉爰
誌以銘曰曹氏之源姬周孤嫡振鐸騰聲陳思著績佐國
信朝攀鱗附翼靈壽春芳睢陽秋宓旌曰義門傳聞今昔
家世永城厥道鄉邑舉被聖恩仕承王秩冠蓋便便門閭
奕奕赫赫洪庥永永何極既固既安實甯實攸天祿可宜
至公不忒先代之塋封諸林域高塚峩峩廟貌巍巍白叟

黃童視茲鑄石

武惠王世德碑

明太常卿張星

義門曹氏爲武惠王世家曰偉曰琮曰璨繼領旄鉞勤王者四登壇者三質諸武惠王之兩總樞密五臨香翰寵厚而憂深位高而心下抑何以加焉河山之帶礪祖德宗功忠義之續承前光後裕本支百世前王不忘至於淵源祇求一是太邱相傳郭姑林先塋西北遺址失真及尋其基於睢水之左而鄆之里人有可攻者十六翁七世孫曹氏諱誠糾族勒碑請銘傳信蓋奕世載德不忝前人者也迄今數傳又將有隙越之懼裔孫育民獨任其事旣推本所

由來而使其男名代奉祀與饗宮春秋俎豆一如古昔而
且百千萬年爲可繼也或曰昭茲來許世德作求豐碑嶼
亭用垂不朽若夫積刼淪沒變遷何可勝紀然亦有銷磨
蕩滌於水火鋒鏑之中曾不若卷舌孤碣騫不可廢與夫
廄之猶欲舉之者此何以說焉予則曰鼎鑛樊卿淚墮羊
叔山川原君子之澤誄誌必賢人之門况異族烏桓過塚
必謁見像生公曹休合轍有鮑昱之著姓始知忠裔克昌
觀朱邑之立祠又見公孫爲盛碑之所以立也志不忘也
存不朽也綿亘河山而激揚忠義也爲之後者繩其祖武
永言孝思抑惟求其是而已育民源流或於十六翁七世

孫誠可稽倘所謂鄧里世家纘璨之緒者是耶非耶前後誠然世濟其善古碑猶存予何飾說

明彭城伯張公墓誌

大學楊士奇
士

彭城伯張公薨其弟都督公以狀來請按狀張故歸德永城名家其先積善累仁高祖諱文銘曾祖諱景惠祖諱從義考諱獻洪武中仕至昭勇將軍指揮使永樂中追封彭城伯諡恭靖進彭城侯爲人敦厚闔爽務義樂施子男女皆三公其冢子諱景字仲舒儀狀豐偉篤實和易表裏不二既冠時仁廟爲世子公命宿衛文廟靖難之師出公伏劍必從東取大甯還戰鄭村壩連大捷以功超授義勇中

衛指揮同知遂援薊州敗遼東軍追至榆口而還以功陞
本衛指揮使二十三年陞中軍都督府左都督是歲冬命
爲奉天翊衛宣力武臣特進榮祿大夫柱國彭城伯食祿
一千石子孫世襲明年侍衛宣廟謁孝陵歸奉命總督操
練左哨軍馬正統元年患瘧疾三年六月卒春秋六十有
五公平居孝於父母友愛諸弟祇事四聖小心恭恪執謙
秉和居靜守約訃聞賜祭葬墓在宛平縣香山鄉壽安山
子男八人我國家慶厚戚里隆之以恩約之以禮無如張
公者藉累世之德善而能修恭儉之行斯所以愈久而愈
盛歟

惠安伯張公墓誌

明大楊溥

公諱昇字叔暉恭靖公之季子也世居永城三代祖考皆追封彭城侯伯兄景襲彭城伯公初以城守功授義勇衛正千戶永樂三年陞羽林前衛指揮僉事調府軍衛七年授誥封昭勇將軍二十一年隨駕北征陞後軍都督同知洪熙元年陞左軍左都督宣德元年宣宗征武定州三年巡邊俱命公守北京四年上優禮至親命轂左府事朔望奉朝請凡朝廷有大政事亦相議正統五年九月封惠安伯子孫世襲六年正月十四日以疾卒壽六十有三訃聞遣官諭祭勅有司賻葬公爲人端重孝友平居簡默臨

卓有定見歷事四朝公勤忠謹未有過宣廟爲皇太孫時
往來兩京及隨侍太宗北征皆命保衛出入起居深有規
益退而未有形於言宣廟嘗欲加封爵固辭又謙抑居心
每陞拜祇畏如不勝其臨政事必諮詢審擇而行不恃已
見交尚道義遇通文學古者必加禮敬服食尚儉素常蓄
藥石以療人疾爲糜粥以濟饑荒猶且留心載籍每引古
忠孝以訓諸子臨終召諸子語之曰吾素無功德朝廷篤
念親親高官厚祿莫能報稱喪事宜從節儉一依文公家
禮無作佛事無徇世俗費財勞人無久柩於家毋高爲墳
塋深坎足矣不幸長子蚤歿諸子宜保愛其子爾等能體

吾心則爲孝矣嗚呼前代勲戚賢否信史世爲勸懲若公者可謂生順死安生榮死哀者矣用納諸壙以示永久云

贈兵部尙書中丞王公墓誌銘

明司馬

練國事

大中丞王公者一代名碩也諱三善字尤名別號彭伯自杭家於永世有隱德至累贈中丞鳳溪公以儒教其子一時廩學官者四人王氏白眉尤稱叔子叔子卽公也公自作諸生每試輒第一人選入成均復居第一人學使者王柱石公深器之令其弟太史衷白公聘公訓其子淑沛得成進士衷白公手公制藝於諸太史咸擊節曰中州之瞿唐也萬曆丁酉舉於鄉辛丑第南宮當館選格於落韻授

州司理廉明之譽甲於湘鄂所至善平反出一轍陞謹
生於大辟後至閔府楚宗有異變獨公力持其寃天下壯
之兩聘秋闈甚得士西川六人中居其兩山左則一房盡
第南宮有兩至部堂者天官一席自古前輩衣鉢之說問
鼎者以大力輿議之當事者屈於清議借公獎恬遂破衣
鉢之說公感知遇一入銓司遂矢以捐糜圖報喟然曰澄
叙流品尋常職分耳當另有可以批麟攀櫂者坐視其橫
熖如此義情填胸何哉特疏諭淮撫李三才且單身清勘
又發書於願涇陽先生謂其不當遙執朝政而忌公者羣
起交章彈射至二十餘疏公挺然不少挫第以驗封副郎

循例假歸而已後淮撫爲李念塘疏敗涇陽先生亦未出山而標榜清流咸以公爲赤轍前彈射公者次第謫斥公家居恂恂於鄉黨閉戶讀書娛親灌園而已未幾起公以考功掌大計旋以憂歸服闋又起公掌文選公持心虛公愛惜人才欲化方隅偕之大道時言路齣重政府不能主反居間相拂遂致訕當路而公借妻喪以行至泰昌政元歲正彈冠起公爲太常少卿時蘭酋稱亂黔省告急以節鉞借才於公公毅然請行曰危疆爲重拘拘體格籍見耳公感慨時事曾有請募敢戰之將一疏至是親見諸施行未入貴陽得二將一爲同邑劉超一爲曹南劉澤情不階

子秩公遽優諸帳下以超典中軍以擇清領前部而帷幄
之勝算乃大定不意副戎徐時達與參戎范仲仁不協負
公委任將兵三萬潰於甕城河且倒戈北向賴公用中軍
超計超以單騎往撫之堂堂數語仲仁跪泣請死超携以
見公公釋之轉爲公用無何文甕安龍正國之潰道路梗
塞黔省困已十月矣羅雀掘鼠亡在旦夕我兵返遁苛責
無喙可答公則焚家書不問恐亂人意大簡閱三軍得其
堪戰者五萬人分置諸將卿枚前驅公怒氣衝冠親臨旗
鼓無不一當百初戰捷龍里再戰捷華舖三戰捷隆峒坡
遂獲鬼於陸廣河外黔省十月之圍以七日解嗣是據備

龍里工何中蔚穢羅猛將宋萬化且縛僞軍師劉法祖獻
俘長安明旨褒嘉晉公少司馬始知公之大有造於黔也
公坐鎮轅門酋已破膽復搗水西巢穴大敗羅蘭兩酋直
抵大方無一賊敢逆顏行使卽班師設土司以彝治彝豈
不百世之奇功哉無奈有改郡縣之議盤桓大方四十餘
日狡酋暗糾烏撒鎮雄與土府之兵截劫我兵以惰歸潰
於內莊道將俱無恙公獨墜馬而死豈不傷哉直指疏上
公功狀贈官大司馬予祭葬謚謚世廩錦衣千戶論者猶
以爲酌公之薄也公伯兄三極以公成例貢仲兄三益同
舉丁酉三仕至曹州守其吏治皆得之公季弟三德癸丑

進士官至浙瀘大參其文皆得之公八孝友無間言居
醇謹一介必嚴一字不干人至今思之所著有四書解易
經解兩集行於世公生於嘉靖乙丑卒於天啟甲子得年
六十公無子以伯兄次子文英承襲錦衣練國事曰人未
易知知人誠不易也余束髮時知公爲非常人及公撫黔
余已入臺班連抗疏爲公剖白奇功以信公於平日者有
素也公志在封疆欲滅奢蘭而後角巾何遽殞身異域豈
非命哉今中原冠禍孔熾使公而在雖蕩平無難也余所
以思公而願爲之銘

銘曰天下徇愛憎而公有眞是非天下畏征伐而公有大

雄威天下忽道德而公能透元微論世成仁者舍公其誰
與依

義士曹仲容墓表

黎淳華容人

大道隱而民俗降私一家以異籜籬私一國以畫疆界其流於不善者可勝道哉上之人立惇信明義之政著旌別淑慝之典皆託賞罰以爲公而回視大道之行則善善尤當急也幸有一人焉輕財仗義豐慶於身而流澤於一鄉一邑則亟賚予表揚之猶庶幾勸賞之遺法與此吾於義士曹君之善所以表其墓而使爲世勸也君諱容字仲容世爲永城人宋武惠王十世孫也曾祖忠祖文彥俱仕元

以醫濟人考諒累封錦衣總校生七子義士其一也時義士方成童奉二庶母若所出母撫四庶弟若親母弟備盡恩義仲安子尙幼義士養育同己子仲繼總校偕厥配歿於京義士親迎柩歸祭葬一以禮遺四子俱幼義士命其長曰旭繼總校次曰晨補縣學弟子員尋入太學時有例監生納粟入選義士誨晨曰汝雖致身有階孰若早致一官以榮吾家吾死瞑目矣於是輸粟三百俾預選曰昉曰賢皆盡心撫育之家有祖田二百畝義士均散族人不守寸土別營莊墅晉家童樹藝克勤克儉久之貴產豐裕鄉稱其賢景泰間歲饑鄉人朱祥劉彬者曾賣田千餘畝於

義士已而愈困義士悉歸其田以券予之不責其償又嘗以穀麥千餘斛白金千餘兩貸程仲禮李整輩百人後其人俱窘乏義士捐之不以介懷周林有喪久不舉義士出己貲葬之有結婚踰時不能娶義士貸聘完之王政行商失利義士篤友誼出自白金二斤濟之終不冀其報凡官府事不能辦者即來稱貸義士皆應之無難色不醉不較也邑侯李進實贈文以彰厥美鄉人咸以義士稱之成化丙戌旱澇浮饑詔聽民納粟補官并賜璽書立石旌異義士曰積而能散禮也乃欣然出粟倍二子曰曠曰聰俱授七品散官承事郎尋又輸粟千石濟賑有司以事奏獲賜璽

書樹坊於家庭異義士先是術者相義士曰公壽不滿五
九既而偶罹疾危無間親疏皆來求醫禱神疾尋愈其後
術者復見之驚曰公丰采異前得非陰隲相助乎心當延
壽矣自是義士康健勝常成化己丑三月十二日考終正
寢配蔣氏生子二卽暲昺孫男四長曰綱補縣字弟子員
次曰經曰綸曰綬綱經暲子綸綏昺子義士疾革時囑二
子曰吾平生雖無善行特未嘗爲惡今得正而斃於我畢
矣言迄而逝暲昺旣葬義士於縣隄堤北之原暲來京師
具述事狀託其親中書舍人張景陽致墓表於予於戲若
義士者豈非積慶於身而流澤於一鄉一邑者耶苦傷痏編

編高峯峻梁義士之名當與此山共長睢河渺渺涵輝蘿
秀義士之名當與此河而同久後之君子一聞其名尙皆
興起凡居斯鄉道斯地誦斯文者其感發當何如哉

萊陽縣李公暨配練孺人墓誌銘

方苞

桐城人

永城李雨蒼余石交也爲余道邑多盛德君子而從叔父
鍾邵公其首稱也雨蒼未第時飲食教誨惟公是賴故其
相知爲最深今年夏月雨蒼有書來京師言公歿已久喪
猶在殯不幸叔母練孺人又亡秋杪將卜其兆域以合葬
焉而囑余銘其墓余意雨蒼之言信而可據銘之異於今
之諛墓者故按行狀譜之公諱昌祖字勺文號鍾邵性純

六歲館師授以孝經朝夕不忍釋手九歲卽能操觚
文十三通經史雖老師宿儒咸歎以爲靡及年十七補博士弟子員慨然以士之溺章句暗世務也潛心載籍博求古來治亂興衰之故當其有得輒發於詩古文辭元本木皆有益世道之言也康熙丁巳科登賢書凡九試禮部皆不報公仍恬然或勸曰古之作吏者豈以甲乙榜分高下哉君固可以仕矣謝曰吾於家庭寸陰是惜何必三公得而一介失乎蓋是時尊人嵋雪公母樊太君咸在堂也於是絕意進取難初鳴盥洗卽偕練孺人周旋親側左右就養無方顧嵋雪公暨樊太君春秋高俱多病療而愈愈

而旋病遂既失其恃又失其怙而天倫之樂不可再得矣
當嵋雪公彌留時灑淚教之曰噫長興汝訣然君親一也
汝能移孝作忠我死猶不死焉公遵遺訓免喪營葬畢謀
所以顯親者丁亥遂筮仕山東萊陽縣令時萊陽游饑田
疇蕪學校荒刑罰煩廉節儼公勞心撫字田疇之蕪者易
之學校之荒者修之刑罰之煩者平之廉節之儼者振之
然後民樂輸公士爭祓濯邑舊例諸所費非正供者皆科
於民公悉爲蠲去竭己物力以辦之而民無擾焉夫周官
六計廉其上也宦裔某者以事責婢婢忿自戕婢父誣控
某某大懼願以千金獻公變色曰令知有法爾若無罪有

金如粟不以入懷若有罪雖多金能潤我哉後廉得其實竟免於罪然公之治萊恩威並用不事姑息捕擊胠篋稍稍縱入境文登奸民王三爲暴登萊兩邑騷然公設方擒治寘諸法其兩邑之患以息三年治成上憲交口譽之將有所薦剡乃以勞瘁致疾卒於官所著有實勝齋詩東海雜咏等卷彭閣學方洲嘗爲叙云嗚呼忠孝者士人常節亦復何奇然王陵棄母溫嶠絕裾以從王事是可忍也孰不可忍也余讀史至此戚戚然有痛於心焉謂若而人也天倫既虧尙何功名之可言哉反是以觀鍾邵公之令萊其克盡父母斯民之道誠有其本矣練孺人爲明大司馬

諱國寧公文孫辛卯遷貢石林先生諱貞吉女司馬公在
東林阮大鋮所指爲急先鋒者也石林先生亦得名於雪
苑社中孺人目見耳聞薰習有素故其事舅姑佐夫子訓
子孫皆能無悖於道方鍾邵公之宰萊陽也終歲所費祇
取給於清俸孺人喜曰吾得爲廉吏婦幸矣最後見出浮
於入則帥子婦歸田里減食節用以所贏餘盡輸於萊常
謂長男廣文君曰汝父貽汝以清白不以厚乎汝仕雖無
民社責然所司者教化也不可有忝厥職以爲汝父羞又
顧諸子曰力耕讀書吾家本業勿荒於嬉各事其事可耳
嗚呼孺人之於婦道也母道也其動中禮法如此亦豈無

所本而能然哉公之先晉翼城人始祖諱本遷永城八傳至公紹公諱支承贈儒林郎孝行詳省志公大父也公幼公生嶧雪公諱懿實維公考嶧雪公學問文章在有明已有聲庠序厥後年彌高德彌劭遂爲中州碩果樊太君婦德亦足配梁凡公之爲言爲行出身加民者有一非得於庭幨間乎公生於順治壬辰十二月十四日子時卒於康熙辛卯五月初十日巳時享年六十歲練孺人與公同年六月十三日巳時生後公二十一年雍正壬子二月初二日寅時卒享年八十一歲其子若女孫曾孫之子若女婿嫁詳狀中於雍正十一年十月十五日丑時安葬於滄瀆

先塋之次以練孺人
補銘曰

山則有璵佩之爲玷誰非人子公切倚閭以公之才蚤致
令聞銅章未受歸賦白雲親旣終天始著吾鞭作令三載
匪私一錢士曰吾師於鐵爲磁民曰我父於祝爲戶公有
佳偶如賓如友相厥夫子共此不朽憫萊之窮儉以飭躬
人拜其賜勿咏大東公雖大去澤猶在世想其遺風莫之
與媲覩彼增水湯湯逝波恐後之訛有石可磨石何以磨
公德可歌

資政大夫呂公墓誌銘

大學士沈桂芬吳江人

公姓呂氏諱履泰字君舒一字調陽晚號耐菴先代世居

中原得文獻之傳南渡後遺族聚居伊洛間明洪武初有
諱成者自洛陽遷寢陵族中故以洛來公稱嘉靖丙辰洛
來公之五世孫鶴樓先生諱世道設教徒居永城生誥贈
文林郎邑庠生諱式尙式尙生勉菴公諱振由康熙辛丑
進士厯官工科掌印給事中充江南主考卽公之太高祖
也勉菴公季子光祿寺典簿諱先勛生誥贈奉直大夫諱
祖灝祖灝生貽贈資政大夫貴州開州知州諱柱石號懿
軒世以孝友傳家清白作吏云懿軒公生誥贈資政大夫
江蘇震澤縣丞諱綏濬號雨田是爲公之本生父母黃太
夫人生公少而穎悟卽爲懿軒公所鍾愛是時公之胞伯

馳贈資政大夫布政司理問諱綏露無子忠軒公卽命公爲之嗣旋侍本生父震澤公宦遊江蘓二十餘年恪盡孝養及震澤公捐館扶櫬歸葬卽閉門授子煥讀書手抄漢唐以來詩命之讀口講指畫以培養性情旣又授以五子性理及經濟等書力誠講貫服習每言書足達用而詩可抒懷吾家爲中原文獻之裔要恪遵祖訓勉爲實學刊其東萊公厯代制度詳說司寇公全書以教族人處兄弟怡怡未嘗有間言析產讓諸弟自擇待朋友始終不渝咸豐初年東南多故公首倡團練之舉論功保獎縣丞公意泊如也亂平後邑中書院及鄉賢等祠破壞倡舉修補宗祠

之損壞者亦補葺完美復念今童考試辛苦捐製桌
燈以恤多士丁丑春豫省荒旱民多流亡首先輸金以助
賑濟其好義樂施類如此以子任冕甯縣軍功奉

旨賞封朝議大夫併賞戴花翎復遇

覃恩晉封資政大夫光緒丁丑仲冬廿四日偶然中風其
子輝省視在籍醫藥備至曾已稍愈十二月初五日復增
痰疾雖言語艱澁而精神不爽猶執其子及仲弟之手指
畫諄囁以讀書承家勿墜文獻之傳爲訓逮至申初竟棄
世去嗚呼痛哉公氣體清癯性情和緩處家尙寬交友尙
誠終日怡悅未嘗有怒容生於嘉慶二十二年十二月初

三日申時卒於光緒三年十二月初五日申時高壽六十
一歲德配陳太夫人初封恭人晉封夫人係黍邱文學陳
君磐石次女子一人卽吾門下士輝也咸豐辛酉科選拔
貢生由四川奉節令涪升湖北補用道軍功賞戴花翎媳
侯氏商邱誥封通奉大夫國學生印鑰長女孫男六人遐
綱遐繹遐紳遐緒俱業儒遐績遐絅尙幼今卜於己卯年
閏三月二十四日酉時安葬於城北巴河之陽癸山丁向
其子輝泣以銘懇乃據其要而銘之曰

文獻之裔宋州之靈爰育君子貌古氣平善著鄉里教子
成名生於丁丑卒於丁丑嘉平朔日大寒三九太邱之陸

河之陽相茲幽宮松柏蒼蒼欽哉敬哉子孫永昌

太學李公配黃孺人合葬墓誌銘

李惺

邑人

丙子冬辦嚴將北上有族弟源來告曰先人在殯久今地
始擇就擬舉葬事兄行矣不能待父生前嘗命源曰不可
抱亦可踏山可繩亦可谷維銘罔極炯厥幽爾其慎諸源
於今鉅公元夫旣少識兄年二十志父行事最且言質不華
足取信於後謹具狀齋肅預以請予固行死義何辭公諱
蒹蒼水其字晚又號拙庵考司訓公諱昌齡祖考江南巡
方侍御公諱嵒曾祖考兵部武選公諱支揚五世祖文學
公諱夏翰兄弟六人爲我諱李分門之始公爲侍御公家

孫生而穎異七歲從蒙師授句讀日誦百餘言不數過卽能覆爲畧晰其劄意已心解旋能設問以窘其師稍長爲舉子業抽思鑄語新警出意表衆咸目以一日千里李氏緒振於斯詎繼遭侍御公變慟勞交至深秋感金氣獲瘓喘症厯輒發誦讀功遂自此輟父司訓公以科目失望深憤之爲援例入太學上舍畀以家政舉事之繁劇胥秉裁焉公爲人軒邁朗豁足級甚濶無世俗鄙瑣氣固其天性屬然亦由席家世鼎盛耳目見聞皆極設張豐大故視珠玉金帛犀象等物亦如尋常往往塵沙用之不自貴重如卹人急扶人困所以耗物力者固多而游閑奏伎輩亦且

收置焉而費有不惜故經尺寸者每以公之於財能用而
不能生流何繼吾則以特免陳思之嘆視所云近步驟
者高出自萬萬也公昆季六人雖命主事有年而室無私
蓄手無餘錢迨分爨既久田園之所出已減而公之豪上
如故其不修邊幅如張司業之所以規韓公者時或蹈之
在當日亦祇藉以適興而傾側者遂由此伏戎以致家業
中落朝夕維難公則處之冲然不以得失爲苦樂抑何中
情浩蕩役物而不爲物役又如此性雖疎達不羈而內行
純摯於父子兄弟間一無虛飾歷數十年如一日父司訓
公任鄉城於戊子夏忽病作信聞公立謂諸弟曰吾長子

呼之當常在側弟等持門戶難盡往時囊底空空遍搜僅堪供五六鄉去永約里踰七百許率一僕徒步四晝夜達趾^盡裂不自覺至則延醫親理藥餌禱神明其閒詭伸攔灑搔孤接抑經寒暑兩易帶未寬門下士來問疾者見公骨立悉感動爲咨嗟不已適汝秋試郊之縉紳先生欲聲聞於學使求表揚公聞之惶悚踵門辭謂倫者常也正人久之所宜踐亦人人之所未易踐祇有愧心無慊心辭至再至三事乃止後疾漸瘳遲至壬辰始相依還里孩提誠於公年幾五十見其他亦可以類知矣夫人生亦務全其大耳大考^五則身世之升沉利鈍皆屬淺鮮且又何能

大漢之以就其蹕涔也公卒於雍正己酉二月初一
六十有八配黃孺人爲諱廷祚公長女淑柔惠和
於儀工女職十七歸太學公協於尊章克誠克恭事夫順
以義處妯娌閒油油無不諧於人情世事咸洞徹能容耐
自抑下當太學公之赴鄉城也值歲荒孺人獨力持柱不
使子源奔營以閑誦讀謂吾家以書爲田田墮本則獲多
穢以瘠則出實不半學亦務致隆其本耳迨公返舍源已
專上弟子則母氏敦勉之力也公雖晚落拓好客靡已
其醜羞瘡孺人皆豫治以需出不匱公竟自忘其不足
而人亦疑其有餘則孺人之以儉爲蓄而不以傷公懷來

視北門之什爲何如也後公十七年卒年八十有四子男三人長卽源邑諸生能復公業者次澤出嗣六房次溥女一適劉君克著孫男八孫女四曾孫男十曾孫女六詳行述今擬葬公於新原黃孺人祔銘曰於戲兩閒輝爍兮維彝常身外浮綬兮胥粃糠志意恢恢兮曾何有乎故方時炎蒸兮時肅霜齊而視之自翶翔旣極復飛再成而不墮兮資嗣謀之臧

李楞香墓誌

夏邑孟曾撰

嘉慶三年五月戊辰楞香以疾卒於予家予兄伯愚治其喪諸所相識咸來哭弔且致贈越六日葬太平村南原謀

賈石碣其墓李子隣野彭子蓀山謂予曰今之葬者皆托
名士大夫以爲榮昔與楞香約有死則生者銘之不外假
也不幸楞香先死予綴其生平事寔君書之接楞香諱曇
姓李氏其先合肥人自高祖文定公天馥籍永城官翰林
編修諱孚青其曾祖也祖昉林父博灼家世稱詩至楞香
苦貧不能爲衣食獨善爲詩初學濟南王氏既而悉屏去
與蓀山過江入湖閣極覽東南名山大澤每自作輒引被
偃卧終夜不能寐鐫剔智慮剗幽墜險窮極怪變見者駭
悸乃復傲睨自喜楞香爲吾邑彭氏出於蓀山爲諸甥少
失父母來則主予與蓀山家數歲不歸性嗜飲酒所覩訛

輒不忘人糾其過則怒剗其詩當則欣然從之喜証語亦時斬斬不可回丙辰秋客鄆陵邑令保麟者奇其才留之固辭北來卒時年四十二無妻子有弟昭來會葬葬於夏楞香志也誄之辭曰嗚乎楞香人皆以爲狂予久與處未見其難近也楞香自顧於世無用益漶漫頹廢不自檢束壹以飲酒賦詩爲事流俗不解其詩則僉非笑之嗟乎人負其聰明才力或去而逐私利一切苟且之爲吾不知視飲酒賦詩爲何如也使楞香周於世故或不達而盡其才於詩可以無弗至然而死矣詩尙不可得爲嗚乎悲哉嘉慶六年歲次辛酉夏四月乙丑夏昌孟曾撰李會瀛書

奇荒賦 崇禎辛巳作

練國事

爾時嘉平既望臘雪新晴戎客停驂柴門晝局數百里渭
濱方爲黃河頌聖億萬人呼籲旋望青鳥何春若使烽火
無虞潢池不弄豺狼遁跡鴻雁歸鳴不將澮水安流燭巖
競秀漸復太平舊觀哉天不悔禍民乃作好始因寇以致
荒繼因荒而益寇紅巾老賊旣虎據於西南白棒新戎復
鶻張於東北煙塵彌漫千村草木皆驚屠掠橫馳萬戶米
鹽若掃封豕長蛇首尾相應焦頭爛額曲徒靡施曉夜赤
霞熾數椽而列炬菱霄黃霧迷寸武於飛沙或破樓或攻
寨嘗有餘威爲蠶食爲鯨吞總無淨土慘雲罷市毒血盈

川枯木落燕泥板橋絕人跡當日牛羊出牧鷄犬相聞不
自知爲豐登之樂此時骨肉飄零墻垣灰燼方希望於涓
滴之仁櫈槍未休歎瓶罍成懸磬疫癟告苦視藥餌如望
梅寸玉寸金難易壺中之香糯一薑一棗貢海上之仙
丹爲益者受噬於兇渠漸成蕭何未亡者終燐於野火特
緩須臾有以鳳毛而建幟於綠林俱以夜郎王爲大假龍
氣而詭言夫赤帝不知柳下蹠之非雒水名藩陷於鼠輩
東鄙彈丸誰不寒心爲禍烈矣哉余東臯數畝不足糊口
僻處陋巷蕭然四壁瓜葛葭莩之親錯槧風雨之友簡陋
呻吟而乞餘粒求湯劑爲療活者十暮不絕以此想大厦

余室貰朽粟紅者其振恤洪慈又何啻萬斛明珠醍醐甘露哉客有揖余者曰奇荒至此甫復有吉祥善事歟予何頌清無乃虛誕余曰不然否泰消環陰陽消長無往不復修禳修救視乎其人不觀發棠固圉有汲黯冠恂其人爲一方請命者乎忽有金鷄大典將膏澤一新又四海昇平之兆也黃河獻清夫豈偶然客乃唯唯余遂單騎而還吾漳鄉以徐俟乎後效

呼山靈檄 己卯正月寓芒碭山寺作

李晳

繙彼永邑眷言茲山雲氣興王爰發洩於漢代嵐光韜采乃汨沒於明時豈獨茲山之羞抑亦斯文之恥七子邇來

以共事請舉霞蔚而雲起甯惟增勝一城行當秀千古
坐高峯以抵掌語落星河掃石洞而探奇氣橫儔侶

李公紹孝子讚

明郎中夏邑人崔捨奇

卓矣李公可則可倣奉親之疾秉親之教不矜繡虎終成
隱豹志操如斯始克言孝

光緒永城縣志卷三十六

詞章志

詩

宋中三首

唐高適渤海人

梁王昔全盛賓客復多才悠悠一千年陳迹惟高臺叔寢
向秋草悲風千里來

朝臨孟諸上忽見芒碭聞赤帝終已矣白雲長不還時清
復何有禾黍滿空山

梁苑白日暮梁山秋草時君王不可見修竹令人悲九月
桑葉黃秋風鳴幽狹

題永城驛

唐薛能

秋賦春還計盡遲
自知身拙是求知
惟思曠海爲休處
忽喜孤舟似去時
連浦一程兼汴宋
夾隄千柳雜唐隋
從來此恨皆前達
敢負吾君作楚辭

永城懷古

唐金封咸邑人
事

芒碭山頭落日斜
太邱城上亂梗鴉
樹分秋色西連沛水
派河流北枕巴父老
喜賡循吏傳閨闥
欣看洛陽花遍尋
古蹟情無限獨立
臨風玩物華

芒碭山石壁留題

宋員陳納人
外號陳淮南

山名芒碭勢穹崇
漢祖嚴祠翠誘中
紫氣有時騰碧落
素

靈何處泣秋風狐鳴陳涉孤墳壞金盡梁王石室空到底
乾坤歸有道力誇扛鼎謾英雄

宿鄧侯鎮

宋 汪 藻

當時踏月此長亭
鬢似河隄柳色青
今日重來隄樹老
一簪華髮戴寒星

微涼初破候蟲秋
露草螢光已不流
搔首興誰論往事
星河無語下城頭

題靜林寺

陳 纲

亂石峻嶠一徑深
岩前何代布黃金
牆餘苔蘚殿堂古
佛繞塵埃鐘磬沉
欲斷暮雲歸遠岫
羣呼幽鳥宿高林
吾徒

擾擾利名役誰肯焚香此息心

題均慶寺

宋殿中丞李咸

一方靈蹟兩峰間斜倚芒山與碭山勝地昔曾鍾王氣高僧誰此掩禪關翬飛傑閣煙鎖碧翠削層崖苔蘚斑千古英雄何處問嶺頭依舊白雲閒

太邱感興

明張星邑人

秋風萬井動寒砧四望平原野色侵舊國桑麻多雨露殘疆烽火自銷沈占星古史傳循吏伐木新聲載好音若使華胥頻入夢幽人無復碧山吟

碣山

高峰占紫氣帝子此中分幾度霞飛曙長空鳥篆雲耕桑
娛父老爵竿載殷勤遠眺懷千古將無定楚氛

柏山

本朝李廕潞邑人

青嶂高盤澗水濱東南秀氣自嶙峋經來斧鑿雲根拔幻
出煙霞石乳新老樹蒼蒼凌大壑流泉浩浩接荒屯但從
春夜城邊望天外文峰月滿輪

石洞

賈開宗商邱

平原山勢望龍從梁孝幽宮峙此中爲借燈光行竊曲始
知殿宇在溟濛岡巒層疊雲霞護洞口蒼茫荆棘叢遙望
漢高湯沐處今人翫首憶新豐

律臺

本朝
巡按李廢昌

荒城遺址自崔嵬傳是蕭公造律臺尚見六朝興兩姓自應一代位三臺頽垣寂歷來狐兔野水蒼茫沒草來莫話當年秦法苦應知漢網本恢恢

夫子巖

明徐卽登
豐城

芒碭山中王氣浮宣尼車轍昔曾遊何年洞自神工鑿今日巖爲夫子留峭壁誰曾攀絕頂遺經我亦愧前儔登臨竊辛宮牆近安得詩書笑項劉

題漢高帝廟

明僉事
曹連彬陽

碣山寂寂昔人非遺廟蒼茫失故基海宇徒思劉社稷衣

尤猶憶漢威儀
黃昏雲落疑蛇斷
白晝風高恨鳥悲
自古興衰關氣運
經行何日撫殘碑

題陳仲弓祠

賈開宗

高踪推漢代
今有仲弓祠
烏雀喧荒隴
牛羊踏斷碑
黨人悲殄瘁
遺像肅威儀
寂寞荒原裏
風流百世師

謁魏公祠

李廢岳

盛世循良吏
巋然峙此祠
兒童說舊令
父老薦新厄
逕竹風鳴葉
庭松雪偃枝
策荒遺愛在
幽勝起人思

蓮花池

在城南歲久淤塞順治己亥大霖雨溢爲湖
浦時聞撫軍有蠲征之請贊此爲里人慰云

前人

澤國逢霖總逝波
遼城高阜湧秋荷
不堪花實謀晨爨
盡祝魚胥供歲科
父老傷心憑古堞
兒童學櫂和新歌
欣聞節府繪圖上
肯令哀鴻歎奈何

隋隄

前人

長隄一望盡荒沙
錦繩當年引翠華
只爲江都入夢好
千秋依舊落楊花

其二

幾行綠樹遶河濱
煙雨年年發早春
但恨風流無盡處
却教楊柳覆他人

隋隄

侯方域

商邱

隋家天子綠楊隄萬古春風野鳥啼幾處吹簫雲漠漠經
時拾翠草淒淒龍舟想像牙檣入綵袖虛無簇仗齊寂寥
荒城南北望老人獨自杖青藜

澮濱書院

明秦社邑人

立馬河濱百尺臺盤渦時見數鷗廻青波竟日常瀠瀉畫
棟頻年已刲灰碑古每慚科斗缺文明快覩鳳凰來源頭
有派通伊洛誰是西京作賦才

三臺閣

在城東南舊爲賓興地昔鑿於兵修復未逮所由慨也

李廌岳

當年此地送征輪傑閣崔嵬四望新依檻人煙迷草樹因
風蕭鼓出城闕茫茫尙憶棟雲碧黯黯空悲戰血燐勝蹟

不堪頻寄眺孤臺何日接蒼旻

崇法寺塔

練彥吉

邑人

渺渺山光檻外凝浮圖勝友喜同登欲探大野無窮色湏
躋丹梯最上層黯淡煙雲芒碭澤高低禾黍太邱城白頭
宜老曇摩室流浪迷途愧未能

五老詩

邑令鍾鳴階

白髮亦可憐黃金亦可捐豈無松菊好長嘯復悠然停驂
訪孫子思邈夙世賢倚樹東臯望黃雲蔽野田載酒臨風
醉微醒聊一眠世態多零落我翁獨翩翩優游商山老何

處訪名仙

孫豹

九臯閑野鶴千里縱新駒玉塵恣高論金蘭契大儒花開
聽燕語春到倩人扶疑義時同晰浮觴任獨嘯枕邊留蝶
夢圮上受陰符爲取清風遠蒼然寫畫圖

黃卷

華髮忽抽簪青氊一撫琴攤書常廢食排律自關心出郭
溪流靜誅茅草藥深香醪堪娛老同社喜相尋

張治邦

一醉羞隨世上門肯曳裾池連吳地水架富鄰侯書樂事
開香社生涯結老漁獨醒人不厭往往欲逃虛

高案

出城瞻紫氣仙李獨蟠根高卧遊蓬島忘機老羨門詩篇
恣逸興樽酒樂邱園何處尋幽賞徘徊寄石村

李良知

贈貞母張孺人

左布政人陸之祺平湖

婦烈多慷慨委身殉夫君一朝從地下志節千層雲藐孤
猶未植家釁方紛紅青氈夫故物鄰架鮮遺文墓草嗟未
宿弓冶隕令聞大義雖已盡貽謀更憂勤亭亭廟貞操甯
忍須臾死茹荼稱未亡努力代夫子庭除常凜肅立身稟
綱紀惟聞機杼聲不聞人笑語韋氏經尚存焚膏課兒穉
奕世載其德哲嗣隆隆起九原如可作生者誠不愧永城
李氏母清淑含坤靈永霜四十載閱歷滄桑更婦德既已
備母儀良足稱讀書窺大義慈嚴道並行伯子持家政仲
子爲儒英再傳及孫叔振翩颺王廷卽今繼起者譽望翔
諸生追思義方教非母曷有成彼蒼或相之幽感有精誠

視彼激烈士從容更難能猗猗彤管輝照耀同瓊瓈

洪氏兩世貞節贈言

邑令孫接武

芒碭盤根厚挺生松與柏松質召蒼蒼柏挺謝赫赫中有
兩淑人松柏同其格聳母撫孤兒熊和求善策桂子勢凌
雲摩空天咫尺忽然中年折田母泣朝夕垂白又在堂洪
氏再遭厄姑也勵其婦立志堅金石諸孫羽翼成挺然皆
奮翮天報貞節人兩母承恩澤鳳誥頌九重璧白黃金赤
贈曹貞女

明 張夏茂

邑人

吾遊數千里奇節常稀聞悠悠世間人薰蕕總不分嗟彼
柏舟文香氣流齒芬吾邑彈丸地閨烈多不羣最奇曹氏
柏舟文香氣流齒芬吾邑彈丸地閨烈多不羣最奇曹氏

節貞操寒玉雲未見夫君面夭死爲天君已經二十秋血
淚常慙盤但願朝班士擊節勵忠勤何人稱野史彤管借
氤氳他日觀風者光搖星斗文

題曹烈婦

練國事

佳儂何知是病夫八年藥裏共成瘧可憐金石結爲性却
愧男兒空有鬚血淚尙餘鸞鏡在冰魂不散墓雲孤由來
曹氏多奇節再看風人奏帝都

烈婦高氏挽歌

御史范良彥虞城

君不見東園桃李花隨風蕩漾落誰家又不見水上綠浮
萍隨風飄泊無定情俯仰乾坤兮惟有山中松桂枝鬱鬱

蒼凌雲漢傲霜欺雪貞四時東山狂客玩物理人生節操亦如此太邱蔣君正壯年一朝羽化忽登仙虹邑高
凜大義心堅堪與松桂比貌諸孤兒誰撫恤翦髮放足誓
必死老眼東向瀉江河此事堪驚又堪喜區區婦行扶綱
紀常笑世間之丈夫背義忘恩非男子採風使者達天廷
旌章遙下榮柔梓萬古應知青史傳小范先已作野史

永城王郎未壯而死妻謝氏自刎以殉其族叔祖吏部

郎尹愚表章其事予爲詩輓之

顧起元

金陵

中庭瓊樹忽彫殘斗帳香囊白日寒矢死從君賦此日忍

將鸞鏡拂塵看

弱軀白首爲君捐何似同時入九泉却憶共姜甘後死斷腸猶賦柏舟篇

慷慨英魂日月輝盛年自喜得同歸生生化作鶯鶯鳥常向青陵臺畔飛

相從天壤得王郎地上何如地下長螻蟻墓時心更苦肯教孤塚閉秋霜

一門三烈詩

練彥吉邑人

奮提長劍斬梟鯨報國捐軀不惜生頸血纏紅原上草棲星雙隕亞夫營

泡幻浮生總電光冰心同許植綱常已經一死垂千古羞

人間稱未亡

咏張烈女

秦社邑人

孽冠高關起秣馬發兼程黃雲蔽四野耀日金戈鳴鼙雷震軍鼓當頭驅電旌中原承平久忽遭烽火驚日昃關不守噴刻全城傾千夫卧溝塹萬戶騰哭聲剽血流平地短劍仍縱橫軍中解縣令堂下坐分羹嗟嗟永城卒胡然血額迎共悲當厄運焉知復太平張家有少女未成合巹盟但工針與線詎意遭牽繫惜身如惜玉含笑就捐生自云良家子不識踰闈行今日辰不再天呼恨難平甯粉刀頭肉不爲糞上英殺身豈不願但恐名節輕徇此一線水心

縣日月明春草何當綠泉光分外清哀哉此烈女千古難爲情

烈女行

周高起江陰人

義不獨生情自死洵稱天壤奇男子幼習詩書壯從軍捐
軀往往如歸視未有芳閨弱息身年方十二三綱矢吾友
胡子來中州自言喪亂拋桑梓辛巳王正介穀辰賊鋒擁
入孤城圮一門星散縛隨營報聞腸裂朱家姊年少書生
賊脅驅慘悴朱顏稚經矣豈期塚上化鶯鶯那望魂歸棲
燕壘花摧玉碎彫梁秋血性貞心炳青史越日郎從賊放
還同穴尋盟人不起吁嗟乎人不起大義昭昭童女爾多

少男兒帽賊中矜郎竟復依毛裏莫言賊眼識英雄此文
精誠天鑒止羣稱胡氏有家風割股療夫擅內美尊嫜至
行邁昔人世澤綿繡歌麟趾卽今父母幸重逢辛苦逃生
來帝里挺然孝義格穹蒼杖杜道周繁薦祉郎須努力事
青雲黃泉待貢泥封紫

贈學博徐先生

侍郎練國事邑人

同作中原嵩嶧看逢君泮藻倚欄杆一官皓首誰云倦千
里青氈不計寒儒雅兼能儔幕府兵荒獨未鎖眉端盡捐
微祿真高義留得公田多土餐

贈王義士

布政顧應祥吳興

賊犯郡縣易賊犯王家難王家有義士一戰賊膽寒古來
用兵不須多專在氣壯與人和干城有人常如此邊陲宴
息當如何

東陵侯墓

張星

極目縱橫望大澤東郊猶自說青門布衣不網西圃市瓜
圃長盈北海樽出灌忘機消日月行歌抱蔓恨乾坤徘徊
五色山形舉笑我蔬狂一醉髡

武惠王墓

前人

太邱古里日提戈清白傳家典籍多樞密褒封新俎豆濟
陽帶礪舊山河風悲古塚鳥啼樹月射荒原兔脫坡回首

江南憂又切令人到此想鏡歌

隋堤柳

唐

白居易

下
人

隋堤柳岸久年深盡衰朽風飄飄兮雨蕭蕭二株兩株汴河口老枝病葉愁殺人曾經大業年中春大業年中煬天子種柳成行夾流水西至黃河東至淮綠影一千三百里大業末年春暮月柳色如煙絮如雪南幸江都恣佚遊應將此樹蔭龍舟紫鬚郎將護錦纜青蛾御史直後下海內財力此時竭舟中歌笑何日休上荒下因勢不無宗社之色如綴旒燭天子自言福祚長無窮豈知皇子封酅公龍舟未過彭城閣義旗已入長安宮蕭牆禍生人事變晏罵

不得歸秦中
土壤樓尺何處葬吳公
臺下多悲風
二百年來
汴河路沙草和煙朝復暮
後王何以鑒前王
請看隋堤亡國樹

汴河曲

唐李益

汴河東流無限春
隋家宮闕已成塵
行人莫上長堤望風起
楊花愁殺人

柏山

明張星

蒼崖聳古柏
翠色倚南山
百雉寒煙外
三台返照間
秀峰當月出
流水落雲閑
最愛虬枝碧
龍光壓九環

夫子岩

明秦時雍邑人

幽岩遺聖跡往轍昔年還愛景無他物尋真到此山
徐可上躡步驟難攀莫訝登臨晚雲深谷口閑

前題

本朝李塵嵒

偶此廻征輶千秋借地靈山川移舊國劍佩儼高星道大
終難秘德尊未易銘寥寥施古意黯立對蒼冥

前題

練彥吉邑人

山自鴻濛起岩從夫子留天門爭一線人世歷千秋蘿壁
晴雲映書臺積翠流只今深洞裏長有夜光浮

前題

王連瑛邑人

萬古茫茫人登夫子巖朝寒雲歷歷晚照石巉巉邱壑

身堪隱處爭欲芟只疑奇勝地別有聖經函

前題

蔣起蛟邑人

詩書縱裂秦水火納竹曾傳魯壁音偶向山頭留屐齒春
風吹拂到如今

漢高帝廟

周叔剛

山河百萬總成非高祖惟存一舊基三傑徒謀開漢祚兩
生空說起朝儀風號古木秋猿斷月照荒郊但鶴悲千古
興亡多感慨淡烟疎雨鎖殘碑

漢高祖斬蛇處

練貞吉

沛公夜過芒碭路白蛇當道攖其怒劍光飛動濺血紅蛇

本無知身死悞王業何曾關此蛇事出偶然非有故如何
竟有老嫗啼乃使千秋聞見述白帝赤帝紛相傳土人共
點路東西英雄揮劍不可見至今雲暗草萋萋

陳仲弓祠

李廌

漢代尊循吏高風尙儼然清流推隱德獨世挺孤舉仰止
新題桶歌思舊市蜃後來多景哲莫謂古今懸

滄濱書院

前人

薛荔生牆日院幽修文佳蹟尙堪求書聲彷彿穿林屋墨
跡依稀似澗流凌郭干旄非今日桓庭馬車自千秋不辭
曳屨留高躅豈之長吟抱膝傳

均慶等泉

何人鑿石尋 液萬古甘流第一泉
日日僧厨供野飯不知也費上官錢

重過芒碭懷太少

李哲邑人

我上八磚學士 盡日淹留不欲回
爭題雲屋三行字爲悞月宮一樹裁
呼山有徵常同賦坐石敲詩獲共裁
青山對我猶相識猶媿登高作賦才

韓公樓

陳聰

先正孤亭墳薛蘿幾回曾待月明過
當年綠綺輝金魄此夕清尊冷玉娥
鶴怨昔人聲慘淡樹存古屋影婆娑
遺碑

墮墮齊民淚欲縚清遊感慨多

紀風變

崇正五年

明張星

清夜鳴金鐵驚雷忽破顏攬江鱗介動捲地屋茅刪勢壯
如驅虎聲狂似拔山誰言妖氣勝虛浪駕潺湲

紀水災

張星

祇恐陰雲密那知膏雨香堯天咨洚水蜀日避离羊粒我
悲難問叩闔緩更傷哀哉流血處但望免輸將

蓮花池釣磯

陳聰

茅屋幽棲古嶼東生涯向釣竿中短蓑數點蘆花雪針
日幾絲楊柳風晦跡已知占在蠱佐時懶說兆非熊得魚

遙遲暮歸去長嘯一聲秋水空

秋夜咏懷

大學士李天馥邑人

娟娟初升月離離出海嶠悠悠河漢間落落分清照秋夜
幽以永披帷何窈窕撫茲怡我情登高寄遠眺倦鳥懷故
林寒螢惜餘耀物理固有然乃悟元穹妙徒倚檻檻間活
然舒長嘯

北鄉田家

前人

農家貴力作可以資吾身拮据饔飧計要令甑絕塵北鄉
殊不然草宅弛耰耘溝塍亦殊佳胼瘃非所耐樹下閒水
梓桑柘前未聞兒女但嬉嬉孰解篆禾成比屋無圍圃菘

非等八珍何以延卒歲嗟哉此惰民

春波詞

前人

新雨足清流滿波森森晴霞灑擊空明輕舠緩桃花細泛
香源暖早波綠晚波紅檣錦帆趁好風載酒隨波無西東
舉杯長嘯夜寂寥月光忽懸江上峰江上峰初月小度重
嵐出林杪殘煙無際春瀨渺華星數點江天曉

春晚曲

百花欲放千林暖綠楊如烟流鶯轉畫樓十二隔春風香
塵暗度珠簾晚珠簾落落掩斜暉二八輕羅正試衣開窗
遙望青隱路夫婿東方策騎歸

春遊

李天馥

香塵數里垂楊路珠鞭玉勒驛驅度水閣溪橋宿雨晴流
鶯處處啼芳樹樹上好音欲嬌春樹下遊輶過往頻日日
看春春不管春草春花愁殺人

行路難

前人

月明開樽花滿堂蛾眉迭進容儀光安歌飛飲歡未劇攬
衣獨起思彷徨瀟湘渺渺秋水長縗出迢遞不可望我所
思兮渺天末欲往從之限河梁行路難行路悲蛇盤愁
鳥道丈夫會應搏扶搖安能躑躅長林草

前題

桃李花東風飄泊徒咨嗟憶昔新婚時婀娜盛年華爾時
自分鮮更事不謂舉動皆言嘉夫何一旦成遐棄今日之
真昔日僞辭接頗不殊眉宇之間不相似還我幼時明月
珠母令後人增嫌忌

近郊閒覽

前人

不盡登臨興無妨至再三花間通綺徑鳥外辦歸嵐蜀酒
孤村得危巔小吏探四圍山色好何必憶江南

其二

引滿清冷數臨風極望賒柔條官道柳淺萼女牆花塔影
籠初日溪光受曉霞鑣聯紅叱撥遶徧大隄沙

大隄曲

李天馥

隄上春光好絲絲楊柳晴誰家遊冶子隔樹撻流鶯

獵

前人

霜野吹笳曉長圍合幾層天空風颯颯雲裏下秋鷹

隋堤柳

呂履壇邑人

長堤楊柳漫銷魂碧色曾承雨露恩殿角三千無限恨春
來猶自縐眉痕

東陵候墓

李印嵒

最憶青門雨園開五色瓜至今千載後珍重說候家

其二

來拜東陵墓蒼茫感慨生休憐衰草色歲歲入春榮

述祖彭城侯墓

自我西郊三戰勝才雄恭靖自干霄層嵐蹶起山無力古
樹猶存木是喬榜吐孝文龍虎氣芳流忠武海塘潮於今
九世孫來奠日暮墳頭拾翠樵

讀李中石御史奏議

黃養正邑人

封事遺篇在直聲閱世新神驥肅柏府法象動楓宸西北
連山潤東南大海春青萍披肝膈彩筆瀉經綸純孝百年
慕孤忠萬里身居家甘淡泊歷世絕埃塵碑滿江淮路功
高社稷臣至今讀奏議千古見風神

哀哀行贈趙生

明秦時雍邑人

山城二月東風惡朝出東門更東郭十里松楸望隴原羣
鳥喈喈春日薄茅屋荒涼棲白雲竹窗華戶傍邱墳嗟彼
趙生遭大故哀哀腸斷沒朝昏年年不識故人面踏破東
郊青草遍黯然策杖出門迎骨立茫茫那忍見歛容隅坐
共徘徊荒村那得好顏開終日相對各無語徐徐強飲茗
一杯嗟嗟趙生曷怙恃往年喪母繼喪父天摧地裂不可
復惟餘纍纍一簣土罔極深恩圖報難三年憔悴疇能安
忍使狐狸眠落日芳草離離孤塚寒敝廬不知春到早晝
方衰經夜苦藥潛潛涕血徹黃泉嗚嗚哀鳴震蒼表憶昔

先人在官途清風直道更齊俱歸來囊中無一物惟有才
籤數卷書趙生莫漫徒號哭試把遺編時展讀九泉耿耿
應蕭然生不能醉死亦足嗟嗟趙生事死如事生前途努力
揚休聲安得觀風遺太史放筆直作哀哀行

新建永壽寺詩

本朝李天馥邑人

聖神天子正御極聲名文物徧八荒玉燭常調世高朗中
天佛日亦當陽詎止四靈爲園沼郊藪麒麟與鳳凰紫氣
盤旋千丈起此中鬢髯白毫光子隨二三元老後親手指
點神飛揚隨有瑤函千里至東關新建大法場自有大師
善知識英烈丈夫具剛腸晚授天童真法印臨濟宗傳賴

不忘昔也開山建宇剝白雲輝照芒山岡今茲隋隄永壽
寺巍巍樓殿聳飛翔一手開出兩叢林接引常住徧十方
善信皈依如雲湧鉗鑷點化身承當共設寶座開方丈請
師高踞曲蓋床千燈一燈燃正炬恰然古佛燃燈旁慈悲
鑒拂加痛棒諸天並証旃檀香西方極樂爲彼岸卽師現
身爲慈航予聞合掌三讚嘆揮灑新詩祇數行釋迦拈花
以微笑相印山高而水長

麥穀雙政

王蓮瑛邑人

夙昔聞三異於今秀兩政政成物自得造化爾何私野雉
迎人雉城花著雨滋黃雲翻作浪玉粒滑流匙翼翼簪能

滿欣欣樂不支風譜如可採卽事一陳詩

歲辛未穀復秀兩歧誌盛

李廷璧

邑人

頴川四長誰與伍太邱於今稱名杜綠野飄拂五日風青
郊翠蔚三春雨芒山煙鎖瑞雲高嘉禾呈祥民鼓舞鼓舞
詛歌良吏才福星照耀斗雲開筆走龍蛇搖五嶽詩成珠
玉映三台春風到處分香屑桃花萬樹狄公栽栽培挑李
歸大雅著書談文眞作者刪訂遺編紹程朱纂輯志乘凌
班馬讀書萬卷筆無塵落落方寸常瀟灑瀟灑磊落濟世
多勤將撫字慰牽篋廣濬溝洫無遺力盛世從此不揭波
高原下隰恩流遍一畝遙闊擊壤歌歌聲藉藉良非偶老

雅蒙恩咸稽首去年兩歧麥肇祥今歲雙秀穀罕有蝗息
知馴何所因願向公堂進朋酒朋酒介壽福無疆滿城苑
雨慶循良亮下碧霄遶殿閣鳳啣丹書詔龔黃借諧雙歧
非異事千古何必須漁陽

張大常廢園

呂祖枚

邑人

奉常昔通隱丈石倚雲根客到頻開甕人歸久閉門空花
隣夢覺清磬閱朝昏太息平泉杳蒼苔繡石痕

送永城吳令之任

名眉江南宜興人貢生

祭酒

吳偉業

太倉人

春風驛樹早聞鶯馬過梁園候吏迎山縣尹來三月雨人
家兵後十年耕鴉啼粉堞河依岸草沒旗亭路入城曾見

官軍收賊壘時清今已重儒生

太邱道中

翰林李孚青

邑人

芒縣鶯花動驅馳倦早春宦情燕市酒鄉思洛陽塵古道
羊腸曲浮生馬足頻隨隄楊柳色初綠已愁人

太邱雜詩

前人

歧路悽南北征衫勞歲年夢魂雙白髮塵土一青槐村酒
清於水牛車穩勝船鄉人留小住瓢榼亦隨緣

過永城

本朝翰林宋至商邱

行盡江南數十程故園風物倍關情棗花零亂槐陰合一路清香過永城

芒碭山登眺

檢討 賀克勤
柘城

高天雲氣散峯頭芒碭孤懸鎮太邱磅礴山光朝看日陰森老樹暮如秋常存佳蹟開巖秀獨賞閒心覺世浮幾處登臨頻問訛每逢險道一停留

次永城

呂公滋
新安舉人

山向東南盡行看路漸低秋風欺病客瘦馬怯長堤紅剝霜前棗黃生雨後梨太邱城郭近落日戌樓西

太邱郎事

李孚青

豔李濃桃夾碧溪韓君輕格入花低錦驥背上高枝得絕勝南唐綠耳梯

楊柳陰中剝啄喧只疑漁火到桃源陶家種秫無多子
有催錢吏打門

牛病人饑畢遲誰歌歸德長官詩柳條生絮賊雙卵昨
被前村里正知

陌上鳴鳩細草薰農夫蠶女故紛紛柔桑宿麥青無際直
到漁陽太守墳

林外沙頭落日徐綠煙紅雨壓村墟匆匆上塚人歸晚野
水齊腰亂渡驢

寂寥粥白興餬甜禁火淮南別恨添夢裏丹山兼碧水平
蕪盡處惄江淹

太邱八景

芒山王氣

水經注云山有紫氣
巖爲漢高祖隱處

呂永輝

邑人

巖端紫氣滿晴空縹渺雲龍在望中萬疊煙雲餘故國雙輪日月照新豐掃除秦楚威猶壯壓倒淮徐勢尙雄喜有

賢侯開絳帳絃歌多士坐春風

山麓乾隆丁亥邑侯周公夢龍建書院文風極一時

之盛

澮水春聲

方輿記睢源之水成文章故中間名
爲繪繪衍爲澮平地湧泉四時不涸

橫前一帶啟榮光四序皆春泉脈長自古源流分睢渙從來色澤煥文章剖符調水冬猶暖泛宅舊綸夏亦涼兩岸蒹葭六橋柳伊人多在白雲鄉

明張東井本朝賀嵩逸賀雲聲劉恕齋劉半村多產

隋堤煙柳

隋煬帝築今自汴至宋被黃河冲沒惟存楊柳極多

長隄一道去悠悠隋帝遺踪今尚留柳色空餘天子恨煙

光難綰庶民愁登臨不盡興亡感盛世須懷逸樂憂鳳輦

龍舟竟銷歇行人猶愛綠陰稠

陳廟霜松

漢陳寔字仲弓爲太邱長以德化民後人建祠東郭松柏極茂

霜壓蒼松冷韻長荒祠異代祀循良聚星盛事傳于古

公興

諸子夜坐太史

化盜仁風被萬方

獲盜遺絹一匹以勸改之

嘗聽黎民

歌惠澤時來野老頌甘棠鄉人共畏陳君短黨禁書成亦

不妨

巴河夜月

巴河係濟水
匯水之支流

青山背郭固金甌
山下清流景最幽
瀼水雙環擬夔國
長橋廿四比揚州
頻添詩興三宵月
消受閒情兩岸秋
漢代循良難再得
河渠疏濬政宜修

鄧臺曉晴

此蒲國之鄧縣漢封蕭何爲鄧侯後改入畿內地移縣於南陽

高臺零亂對荒城
幾度登臨感慨生
三面荷花紅粉綻
四圍楊柳綠陰橫
我來避暑乘新霽
儒者讀書享大名
讀書臺上胡氏
科名莫謂邱生同
造律方興地志辨
宣清皆中

石巖積翠

孔子自宋返魯過山麓遇雨率弟子過石厓下後人因名夫子巖

石巖深邃幾星霜
偶此停驂仰素王
四海盡尊夫子學
空

山猶闢聖人堂。晒書臺古石階。老習禮庭空草色。荒屢沐

春風拜遺像。書帷詩社兩相望。

石巖東卽高閣邑土羅

筠李宇結詩社其中

寶塔盤雲

在崇法寺後
宋經聖寺建

東林古寺蹟仍留。七級浮圖踞上游。保障江淮稱巨鎮。屏

藩梁宋護中州

咸豐中皖匪屢圍縣城邑侯劉公鴻昌固守數月不破豫東郡縣獲全

盤空

直氣通霄漢。孤立雄風震斗牛。閒陟丹梯一憑眺。關心欲

掃望洋愁

時洋教分布中
華宋獨無留者

曉隄

呂永輝

濛濛煙雨暗長隄。幾歷興亡蹟未迷。牀水無渠尋故道。揚

州有樹發新荑。歌聲採袖皆芳草。鳳輦龍舟雜翠泥。勝日

零春城畔望綠揚深處鳥空啼

紀星變

光緒乙酉十月二十二日夜

前人

千古驚奇變奔流亂吐芒誰憐天道遠不識我心傷惡帝
曾傳晉昭宗更溯唐披書卜占驗掩卷痛茫茫

梁苑懷古

王身修

邑人

世系雖由帝室分藩封閫外遍傳聞只緣凝后偏憐少竟
使騎王僭擬君廢殿歌殘人自古荒臺賦後士無文會當
雪霽城邊望惟有寒鴉帶夕曛

捕蝗至永城留別呂觀察

本府文悌

滿洲人

此地曾傳古太邱羹牆先哲憶名流魯恭政異蝗投水羹

遂官清劍買牛敢信文章通法律始從戎馬易田疇題詩

不盡東南美爲記鴻泥七日留

太邱社行

周武王三年太邱社亡注殷社也

蔣孟尾

邑人

天厭殷畿畿欲摧周家八百王氣開太邱社沒春草裡芒

碣鑿開石色紫一朝墮入黃泉水萬世千秋永不起報君
占來厯數意惟有仁心能不死

龍亢行

河南通志孔子五代祖墓均在鄧台西北之龍亢孫子用

龍脈千年老不死長抱孔墓環增水六墳靈氣滿寒空野
花歲歲上墳紅爲昭爲穆薹草中東山泗水遙相通多栽
翠柏和青楓蟠根永護來去龍

芒碭真人歌

中原逐鹿無消息芒碭真人生愁色三秦大戰血淋漓八
千子弟收不得白帝子斬九鼎裂祖龍鱗下紅鬚拆一忍
賺得萬國心卜年四百漢日月

梁園吟

梁孝王築由睢陽至徐淮三百里

老濞頭顱一見過梁王慶地跨黃河陽侯不敢水揚波乃
羅詞客雜青娥燕喜樓中長想思漢家天子六龍飛親送
梁王歸東陲名山秀水東南涯出警入蹕乘輶驛

三徑草堂吟

勃海太守蔣詡棄官隱於芒碭築草堂開三徑

棄簪綸置褐襦謀顧啄哺吾鷄草堂聊足蔽風雨三徑雖

開何處去國師維私親成空善賦好友憑闌中有影
形願影秋月愛白春花紅玉樓金屋幻頃刻須防禍機
可測

隋堤曲

煬帝游揚州時策

蔣孟尾邑人

楊花欲落陽春老隋家天子太草草花愛如梳月如盆占
斷風流忘昏曉揚州花綻園中煙瓊花不教春色闌翠華
東指龍舟在殿腳三千牽管絃日落雷塘蜀帳昏玉鈎斜
兮罷承恩錦山繡水杳何處一隄楊柳新鶯語

永棗行

進貢名
蒙補

永城貢棗壁爲空年年修貢入漢宮秋雨秋風棗房暖沉沉

師看火聽漏板燭映屏風簾影昏滿堂
萬刀巧無痕稚婦幼女誇上下手法私語感閼甄貢舟肅守泊煙渚中秋起
貢長安路君王光明如陽秋忍死明年再去貢

土紬行

漢書淮濱之間出文章熙朝
綢織衣裳用焉故產白綢

城北灘水南渙水灘渙之間養龍子

府志養龍池在郡城南

蘊得靈

氣波光寒洗出土綢光練起

用他處水一洗即變

爛如太乙然青黎

皎如淬花白鷗尾直肅清廟百工心衣裳用爲非無字
爲黻黼樣麗毅風吹不動身如玉著出恐教白帝驚又薛

鬼母秋郊哭

文石歌

山海經註芒碭山有文石焉可以爲硯

礪高高且寒鑿得文石匣以檀紋成八卦質勝玉
作硯兮文房足不渴不滑蒼復光楮叟陳生同匡床用
攬槍頭委地佐人草檄聲不膩憐含玉氣帶秋色芒礪真
人留不得求賢去奸心不慵英雄空仗拔山力靈氣長映
北斗斜曾供將軍夜量沙只今落魄歸何處猶助先生筆

生花

買頭吟

梁七國反漢帝用計買吳王濞頭顱葬此故名

噫噓噓老濞頭顱長安來梁王獻誠誓碑回大開梁國五百里文吏武吏皆良材噫噓噓自古臣良君則聖以孝爲本梁之政貢黃金百白復千漢家天子受而敬噫噓噓金

多買得奸王頭臣姪劉武小子侯誰其執繡百執事喬如
相如嚴枚鄒噫嘵嘵買頭埋頭今已矣地名買頭由此起
怪底梁王座上客半酒半詩無棋叟

田家樂詞

蔣孟尾

朱女陳男相匹配木棉花好紡冬衣合村老大無離別笑
殺賣家織錦機

竹枝詞

前人

兒家住近睢水頭種得金針碧玉稠莫怪渠儂家不喜又
催兒婿下蘇州

故紙花開紅更紅脫花新子綠盈盈提籃採到花深處

唱兒家腸斷聲

贈呂玉山茂才

前人

采芝歸去寄城隈
羸得清風兩袖回
大雅能追何北地
家風不改宋東萊
囊空有劍休彈鋏
眼冷逢人漫舉杯
興頌文章須大手
君王正建柏梁臺

竹枝詞

呂履泰

邑人

漫挽烏雲整黛鬟
相邀小隊步春山
爲貪此日風光好
不滿筠筐不肯還

溽暑金針菜上遲
夢秋初過正閒時
綠桑葉老蠶工畢
楊柳陰中正捻絲

戊子秋日偕李大尹

天墀陶院長

大明湖北舉人

登芒碭山

項徧覽山間古蹟

任 恢

邑人

多年不拄遊山之杖著芒屨境內名山峯遠懷偶然隨所
值意興卽與山人偕吾聞芒碭之山名最著僅從輿圖披
閱乎高齋今日縱流覽雄遊不與心相乖攜朋歷磴陟高
頂欲舒望眼先摩揩下視中原大於海突起此山如浪排
隆準密雲洞珣峨高望佳大蛇中指異蹟分封留作梁
園臺梁園周匝三百里此間聞參辰射列石鼓而無字
歷刲火以存煤穹碑重刻金源號鋪甃砌朱梁碧瓦爐
屢改稱稜迭搆龍躡鳥蹟煙埋雨逕石柱搖撐而巖崿石

深浸沒乎莓苔遐想當年用石不用木得毋欲與天培爭
此千秋不朽之崔嵬山如傳舍啟人如過客催過客一去
山寂寞傳舍無恙人塵埃入眼雲光指旦夕摩挲舊蹟那
如顧窟不鑿銘樽罍望僧舍兮延伫厯佛殿兮徘徊經營
締造留爲香火地靈光歸然吁壯哉古人已往不可起而
問焉能預逆今日憑弔如吾儕足蹟偶到耳託諸筆墨留
山隈安知後世不有覽古悲歌之士如吾三人來

芒山十四首

歸德府知府趙瑗雲南人

避雨崖

往問老子龍道阻空山雨茲崖經曬晝聖蹟亘終古

漢高帝斬蛇碑

中原競逐鹿一蛇阻中谷揮劍白帝終蛇母秋郊哭

密雲洞

有雲占從龍雲集龍將舉范增亦丈夫高望不如汝

大定碑

代遠紀王宮穹碑立臚屬剔蘚識重鐫上有大金字

石佛

何年初入定未識點頭頻無勞鑿混沌成此堅固身

清冷池

貯水浸雲根冷然清不渾天風御玉女高剗洗頭盆

梅花石

點點天地心淪入秋崖裏作賦宋廣平鐵石心不死

摩頂柏

側生傍巖廬受戒勤頂禮寒歲放圓光佛頭青不洗

銀杏

松柏生嵩泰山將軍與大夫十圍量此樹早得愛封無

碑崖

松煙侵斷崖有碑亦虛設至文本無文何處着言說

石鼓

有鼓佛能考夢白儻堪杵更無車攻文移作僧寮礎

古井

澄定久無波傳言不可食鎮以石敢當孰使我心惻

石棋枰

上方半似刻下界日如梭仙侶終棋局山樵爛斧柯

廢殿

指點廊廡基空存天地宇荆棘望中生銅駝卧秋雨

丙午仲秋奉委之永城縣勘驗水灾仲冬復往散

卽事詩

汝寧通判

趙師鼐小字
皖人

三月霪霖事可傷田廬漂沒等懷裏草根地盡夏難白菜色人多貌自蒼水湧波紋吸芒礮天連雲氣落滄浪時復災象苦雨

災象救荒莫漫悲無策會取仁風好奉揚勘災

馳驅敢惜讀書身我亦蒼生隊裏人酒暈新攬襟上淚鞭絲高颶鬢邊塵災如善救還爲福政到能均漫患貧時因災民過衆不敷用

均難匀放法收拾眼前無限血和將殘墨繪流民散粟

白頭叟

哀永民之罹災也

停車古太邱趨近白頭叟問叟貌何憂叟立勞拱手惻惻

前致辭未言先抖擻道彼蒼蒼天降災良非偶二麥甫登
場陰雨隨其後震霖時淋漓斷續三月久沉竈產青蛙浮
雲幻蒼狗霉變麥生芽偃卧梁棟欹大木塞道塗餘殃及
杞柳巴溝兼澮河氾濫連洞阜舟由地中行免罝倏魚笱
忽聞東家悲良田成淵藪復聞西鄰譁狂風壞戶牖南村
多流離涕泣呼良友北舍暗酸辛商量鬻新婦雖攜錢十
千莫獲糧一斗尋常小康家覓食難餬口飯糗祇二三苦
飢常八九方祝秋稼登相與償逋負何期八月間連綿卯
至酉靡復有子遺搜掘罄菘韭頻遭饑饉凶弗遘栽培厚
我心更悽愴老屋空株守讀書少壯年有文曾覆瓿兒

漸長大老妻同衰朽輒耕以待斚此情告誰某疇昔
年稼穡高培壟合歌琴無絃新熟酒盈缶清蔬娛嘉賓肥
壯速諸舅其樂信靡涯况乃禁多取無端湮溝渠遑冀歸
斯受脈絡不貫通旱潦皆災咎今茲苦淫雨紛紛爭搔首
君自夷門來此情君知否安得鄭監門繪圖告我后卹此
災民災縞我壽考壽使不惠善良何由戢稂莠願君味斯
言先語賢父母揖別載驅車之鄧陽右道逢壯男子揮
淚挈家走

元城縣志

原书缺页

原书缺页

原书缺页

原书缺页

著述

事友堂集

王三德著

醉石軒詩集

王三德著

顏子釋

張星著

石龕詩草

張星著

近思錄

李文振著

實政錄

呂坤著

呻吟語

呂坤著板存
呂氏家祠

小兒語三字訓

呂坤著

去僞齋集

呂坤著裔孫呂履泰重校刊

松軒集

高等著

掃葉居士集

練貞吉著

苦海記

張夏茂著

七十二賢考

張天瑞著

李御史奏稿

李楠著

復菴詞

秦堯化著

容齋集

李天馥著

呂黃門奏議

國朝呂振著

穿石齋詩一卷

王連現著

遺安堂詩集

王連瑛著

垂雲堂集

李汝寅著

度森堂集

李印齡著

心遠樓詩文集

丁啟相著

野香亭詩集

李孚青著

鞠圃詩集四卷

呂祖枚著

求是齋文集

李汝霖著

瞿庵治譜

趙士驥著

綺園詩草二卷

呂雯著

開陽教化歌

呂柱石著

墨巢存稿

賀不侈著

旅游秘笈

王禕著

卧游錄

呂祖灝著

飯牛山人詩存

呂誨敏著

楞香詩草

李曇著

南野詩鈔

呂履堯著

理學宗傳辨正

卷

劉廷詔著

燼餘草

蔣孟尾著

退思軒集

呂履瑾著

筠亭詩草

羅筠亭著

王山草二卷

呂履埠著

六柳逸人稿

洪一波著

芒山詩社存稿

顧璽輯

浣吾詩鈔

李鎮著

絆心齋詩草

李仰納著

霞遠詩草

王五雲著

容庵吟草

賀清潤著

卧雲集

王襄著

性理輯要

呂履泰著

文廟從祀錄

呂履泰著

懷清堂雜著

呂履泰著

烟谷詩草

胡其焯著

樵唱軒叢書

崔乙震著

稽亭雜著

洪文皆著

星門集

蕭九澤著

居易堂集

洪東耀著

永城士產表

邑侯韓國鈞著

鑄錯齋叢言

練貞吉著

國朝近思錄

呂永輝著

名言彙鑒

呂永輝著

篤實堂文集

呂永輝著

太邱書院存書目錄

欽定周易折中十六本

七經皆呂等寶堂捐

欽定書經傳說彙纂十六本

欽定詩經傳說二十四本

欽定禮記義疏五十六本

欽定春秋傳說二十四本

欽定周官義疏

一本

欽定儀禮義疏

一本

大板廿四史壹百零二套

銀一百二十八兩
岳邑侯捐購

御批通鑑輯覽大板六十本

銀十六兩

先正事略十二本 銀一兩二錢

三通考輯要三十本 銀九兩二錢

九通

全部 三十六兩四錢

中外政治策論彙編二十四本 銀四兩六錢

各國政治藝學全書三十二本 銀六兩

皇朝輿地畧二本

呂篤實堂捐

天下郡國利病書八函六十冊本 銀八兩

皇朝經世文編二十四本

呂篤實堂捐

皇朝經世文續編三編四編新編共六十二本

銀六兩四錢

萬國易知錄六本

銀九錢

歷代史論七本史略六本銀九錢

十一朝東華錄八十八本銀九兩二錢

正誼堂全書壹百六十本銀二十九兩

石印大學衍義一部銀一兩三錢

歷代名臣奏議一部銀一兩五錢

聖武記一部銀一兩四錢

東萊博議四本銀三錢

大清會典六函銀一兩三錢

名臣言行錄十二本銀一兩五錢

大板康熙字典四十本銀二兩五錢

大板百子全書全部 銀一十兩

說文十六本 銀二兩五錢

漢魏叢書八十本 銀六兩四錢

數理精蘊二函 銀二兩八錢

中西算學大成四套 銀四兩五錢

梅氏叢書二十四本 銀八兩二錢

算學啟蒙四本 筆算三本 銀一兩二錢

談天六本 銀一兩五錢

吾學錄六本 銀一兩五錢

古文淵鑒三十二本 銀九兩

唐宋文編二十四本 銀二十四兩

古文辭類纂十二本 銀一兩二錢

昭月文選十六本 銀一兩二錢

國朝文錄一部 銀十八兩

四種遺規六本 銀三錢五分

文心雕龍四本 銀二錢

武侯全集十本 銀一兩二錢

胡文忠公集 銀五兩

湯子遺書三十二本 銀三兩五錢

陸宣公奏議一部 銀一兩五錢

歐陽文忠公集三十二本 銀四兩二錢

朱子全書四十本 銀八兩四錢

孫夏峯全書二十套 銀七兩二錢

曾文正全集一百二十本 銀十二兩

明儒學案一部 銀一兩二錢

性理精蘊一部 銀二兩

理學宗傳四函 銀四兩

石印海國圖志一部 銀三兩四錢

農政全書一部 銀一兩三錢

綾邊地球圖二軸 銀三兩八錢

五大洲全圖一軸 銀一兩八錢

幼菴蘭花一軸 銀一兩五錢

松鶴圖一軸 沈父台捐存

硃紅對一付

印扇面屏四張

聖諭廣訓直解二本

呂篤寶堂捐

近思錄四本 廣近思錄二本

國朝先正學規二本

小學集解四本

呂制冠公實政錄六本

呂司寇公去僞齋集十本

呻吟語六本

明道書院志二本

杞縣節孝錄一本

名言彙鑑二本

均呂篤實堂捐

光緒永城縣志卷三十七

叛逆志

明

劉超先爲晉人其父賣於永城因家焉超履而長有才武能讀書於左國三史畧皆上口壬子戊午兩科再中河南武舉俱第一天啟二年永城王三善爲黔撫超與曹縣人劉澤清以偏裨從時安邦彥圍貴陽己十月三善進兵龍里追至老鴉關超出廣陵兵旣勝而驕恣搶掠反爲邦彥所乘諸將多死而超獨免積勞遷四川遵義總兵崇禎中同邑練國事丁魁楚丁啟睿皆以督撫討賊超以故將在

總理五省軍前勅用九年秋兵部敘黔功超以解圍蔭一
子外衛副千戶世襲超上書闕下訟言功大賞薄有怏怏
心十二年正月赴京聽用朝論以其怨望斥之六月十八
日復歸永城會河北土寇大起李自成攻汴梁甚急上募
能救汴者超應詔請招募土寇率所領六千人殺賊乃用
爲保定總兵名救汴實不行與其弟越陳兵出入多與羣
盜通永人大不便之御史魏景琦會言事罷歸負氣詆超
爲通賊超不勝忿起殺景琦全家三十餘口並舉人喬明
楷而反新授河南巡撫王漢奉密旨自懷慶提兵至永城
聲言招撫練國事丁魁楚等夜開北門納其軍方坐城頭

發降票超死士猝發遂遇害超與其婿王全黔謀拘總督
事丁魁楚等逼令草公奏爲已請寬罪而全黔令其舅高
擢者同王仲寶曹育民等五人齎本以入爲金吾緝事者
所獲供劉澤清爲之囊橐上置不問而命鳳撫馬士英太
監盧九德河南總兵陳永福討之九德以十六年四月初
六日率京營兵至永漕撫史可法遣參將李世春千六百
人鳳泗總兵牟文綏挑精騎皆會而副將周士鳳扼雙溝
以防奔逸賊於初七日突圍以攻東北諸將乘銳合擊十
三四日兩晝夜連戰十五合賊死不可勝數其氣遂衰
士英遂檄劉良佐於正陽率諸將劉澤洪等從頴毫趨永

以十三日至而黃得功在廬州率精騎千人爲士英前驅
士英自率中軍楊振宗等從宿州趨永十七日質明至諸
將乘銳渡濠直抵城下故督師丁啟睿時在城外士英與
之謀得賊虛實偕永福及副將丁啟光等議築長圍先是
永之紳民築城濬濠製炮積糧以防流寇至是反爲趙用
永人逃出則全家俱斃驅無知之人以當鋒鏑官軍之被
傷者亦千餘人上憂賊之負嵎也特發御前銀一萬兩各
邑鱗衣斗牛飛魚等絞絲一百匹犒師超窮急請降士英
僞許之旣出見猶帶刀自備士英下與之禮手去其刀曰
若歸朝何以此爲已而潛易其親信遂就執五月三十日

聞下詔曰反賊就擒城中紳士得全朕心嘉悅六月朝
獻俘超與其弟越委這處死傳首九邊其妻妾子女給
臣爲奴家產入官父母祖孫兄弟俱流二千里超黨張君
煦者勇善戰亦論斬超時年六十二超好交遊東南及中
州名士罔不結納少時自負其才以永城人不許令就文
試故俛而從武往往與同里不合王撫軍漢字子房其遇
害也超爲文祭之云古之子房善謀君何輕身失算誤爲
亂兵所害所以自諱其反也超向在黔中曾保全馬督寧
口於圍中貽書士英深自辨置文義頗可觀其就執緣誘
降當時塘報未盡實然殺近臣戕撫軍嬰城拒戰其反決

矣此其當誅非可以淫詞他說解也

寄園寄所寄

附錄劉超紀畧

李廡岳

劉超者永之渾河鎮人也少習儒中武榜第一從巡撫王三善復貴陽淳至都督同知鎮守四川重慶總兵官未幾以病廢家居崇禎八年秦寇入河南東逼永城時承平既久人不習兵倉卒爲守禦計超乃移家入城身任其事日與薦紳先生遊十五年薦遼綱督范志完疏薦超材勇起保定總兵兵科給事中方士亮論超觀望逗遛不堪任使詔使歸援汝汴先是御史魏景琦落職還里永城知縣傅振鐸奪超守備

之任以屬之超恚恨甚輒欲甘心焉會有保定之命
乃止及歸有告於超者方給事疏乃舉人喬明楷
之因明楷興超有舊怨而士亮爲楷兄明海同門友
也超復恚恨明楷更甚十一月一日擐甲操兵至景
琦家手刃之琦祖父子孫五世一時遇害復殺喬明
楷興總練生員王奇珍是時舊秦撫練國事家居超
馳馬往見國事喻之曰庶民讐怨殺人罪及身耳將
軍國之大帥奈何冒反蹟爲族滅計超乃稍禁屠掠
而近永之盜皆隸超部下鳳陽總督馬士英聞其事
贈超書諭以三策或束身歸闕備陳冤狀或誅鄰近

土賊以自効或安常守順聽生死於朝廷超不能用私念士英貴陽人有夙昔之誼於是欲依士英爲解免計十六年正月河南巡撫王漢奉密詔討超至永城駐軍東郭夜半練國事同總督丁魁楚光祿寺署丞張星行人莊則敬啟北門以應官軍賊衆驚起巷戰漢裹甲親督諸將及超門俄而兵爲賊掩襲大潰漢竟歿於亂軍參將陳治邦陷於賊不屈死超知巡撫死益自分無生理日與賊將張獻策肆爲屠掠無復歛戢總兵陳永福聞變一日疾馳四百里薄永城環濠築短牆以防衝突超與弟越及張獻策數跨濠

出戰皆敗獻策兜狡自恃浸不爲超用貢士曹名玉
說之使圖超自贖謀洩超怒殺名玉心疑獻策四月
馬士英奉詔討超帥總兵官黃得功劉良佐杜文煥
諸路兵抵城下以檄諭超謂宜釋兵棄戈束身就逮
以明不敢怙終之義不然金魚檻獸安能復脫平超
窘甚上士英書言解圍有大功今天下反者不可間
卽袁時中久厯小寇招之不就何獨嚴於超耶士英
諭之曰天子之欲申法該鎮也蓋以官品已高受恩
獨重躬爲不法不可以訓待之之意良厚該鎮乃舍
元戎之貴去忠孝之義欲與時中伍乎今疏請使過

力所可能若擁兵踞城則吾不敢試法超喜乞降練
國事丁魁楚張星莊則敬達士英慰勞之明日舉全軍出東
英許諾超單騎出見士英慰勞之明日舉全軍出東
門士英密令得功斬獻策劉良佐擒獻策弟獻璽發
兵圍其營超出降至東關得功抽刀由背斫其頸頭
旋落士英奏聞傳首九邊

按此篇與寄閩寄所寄所記超變不無歧異然李爲
邑人見聞較爲可據故並錄之

國朝

馮震胡庄士棍綽號老撲手道光二十七年知縣高賜祺

因拿趙之琛不獲乃募震充膺皂頭之深遁沛縣震卽劫其財貨焚其房屋而震遂不可制盤踞李家口岳家集如羣虎又有東興集李月亦乘勢聚眾據王家溜子邑令會營帶領壯勇劉自順等往捕匪來迎戰於官庄店李月敗走興馬震合晝夜焚劫不已兩股約四五千人其後益衆官力不能擒治咸豐初二酋投效周漕帥天爵軍營三年六月二酋復棄軍逃回趙家屯聚黨豎旗眾復數千八月推渦陽張樂行爲盟主七年五月李月被伊都統興額擒獲斬於軍門馮震不知所終余振山又名麻合薛湖東南余大庄人張樂行妻弟也咸豐五年邑貢生朱來青等

請麻合先容樂行邑眾將興講和期會雉河集麻合因事
遲悞來青等親見樂行許輸糧三千石樂行諾永紳歸而
麻合始至麻合耻功之不由己也借永邑東北鄉火謠云
聚眾來襲以激怒樂行樂行果大怒卽於六年正月十一
日遣李月先行來寇已亦大舉繼進麻合自請假旗一杆
回薛湖聚眾自北來應猖獗十餘年不知所終

蘇全馬村橋人綽號立稜眼咸豐五六年間據馬村橋寨
有眾數千同治二年正月僧親王大兵親攻其寨越二十一
六日未下忽於夜二更蘇全開北門遁其眾遂亂被官軍
追殺大半擒其妻並其寨主何振河斬之二月初二日在

雉河集南與張樂行同時被擒凌遲處死

趙浩然城北趙庄單人武童生咸豐六七年間聚眾萬人桀驁兇狠爲土匪之最九年六月攻破劉家崗寨殺劉姓男女二百餘丁口同治元年於澮河南岸張家瓦房築寨與侯豹盤踞其中以爲巢穴亦與張樂行連合七月九月官軍迭攻張氏房不下獲其軍師李京揚斬之連年北擾侵洪大樓寨入據之同治二年正月僧親王大兵至浩然退居張氏房王圍攻之浩然偕其弟三臭與匪黨侯豹率馬隊百出降王縛浩然兄弟解歸德獄候處餘皆赦釋豹乘間遁獲其妻斬之查鈔浩然家產軍械其妻蔣氏並妻

七人暨三莫妻浩然子妻併下縣獄旋奉

旨治然三臭盡刑處死遂寸磔於府市梟首東西城門家屬皆斬於邑其子趙住逃竄宿州旋亦被執解永斬之浩然表兄李加英率集人咸豐七年聚眾數千管領三十八匪寨與皖匪連合不甚殺人同治元年匪勢漸蹙加英所管三十八寨俱背匪投官加英隣人謝香亭在縣帶隊因說加英投營加英首肯而匪黨覺之倍加防範加英不得自脫正黨陰約皖匪來助又謬謂官軍陣前受降官不爲備知縣陳灝被害官軍敗潰閏八月初三日加英乃拔身隨謝香亭投誠由富都統以獻於僧王時王駐夏邑王貸


加英死檄全帥點收加英馬兵六百步勇二千留大營
用勦捻勦苗皆隨軍帶隊賞都司加遊擊銜

同時小匪首田現趙有剛高春芳曹老虎

陳懷安陳麻狼徐哈子王法孟張大同

樊永清竇元帥郝更朱拉岳廣

孫廣躍張柱楊夢吉孫同



永城縣志卷三十八

雜識

宋人或得玉獻諸子罕子罕弗受獻者曰以示玉人玉人以爲寶也故敢獻之子罕曰爾以玉爲寶我以不貪爲寶若以與我皆喪寶也不若人有其寶其人稽首而去曰小人懷璧不可以越鄉春秋左傳疏接此玉出柏山

宋愚人得燕石于梧臺之側歸而藏之以爲寶周客聞而往觀焉主人乃齋戒七日端冕元服以發寶革匱十重客見之因掩口而笑曰此燕石也與瓦甓不殊

郡志

墨子名翟宋人仕宋爲大夫外治經典內修道術著書十

篇號

世多崇之

公輸子嘗爲楚造雲梯以攻宋墨

子說楚王罷之墨子年八十有二乃嘆曰世事已可知

榮位非常行將委棄流俗與赤松遊耳入周狄山精通道

法想像神仙

列仙傳

周狄山在芒碭北

城北買頭鎮土人未詳其始考漢書七國反以殺晁錯爲
名漢帝子錯遣使說之不聽乃以計購吳王濞頭獻馘長
安勦衆斬以殉埋之中塗亂平

邑人蔣次心
燼餘筆記

芒碭山椒產文石工人取以爲硯潤膩異常

山海經注

亳州永城縣之七十里有芒碭山山有巖曰紫氣此蓋高
帝避難所也復有梁孝王墓僕嘗與宿州知錄邵渡同遊

入道中百餘步至皇堂如五閒七架屋許大周迴有石門子十許上鐫作內臣宮女狀中有大石柱四所以懸棺棺不復見矣入時必用油圈以爲燭其中盛夏極涼如暮秋時山下有居民數百家今謂之保安鎮蓋當時守塚之遺種也土人呼墓爲梁王避暑宮故老云前數年時有人入其中常得黃金而出今不復見矣孝王傳云未死財以鉅萬計不可勝數及死府藏餘黃金尙有四十輿餘他財少
此是想見當時送葬之物厚矣魏武帝置發塚中郎搜金之尉如此塚蓋元不發者然古人作事奇偉可驚非後世比也

宋馬永卿懶真子

傳記孔子其祖弗父何以有宋爲宋厲公及曾孫正考父佐戴武宣三命滋恭逮孔父嘉爲宋督所殺其子木金父奔魯越五世而生孔子文曰聖人有隱者若不當世其後必有達人其在孔邱乎蓋指正考父爲聖人其五世墓皆在鄆台西北之龍亢鎮是弗父何正考父五代無疑或曰金亂其七十三代孫移鄆台龍岡之祖改葬於夏邑之還鄉里非也塋有祭田墓有碑記明弘治初尚存汪介人中州雜俎

永城有張生者屢就童子試不遇讀書芒碭山天齊寺攻書之暇散步殿廡見東帝座下判官像貌偉麗戲拊其背曰人間安得如公者吾與論心訂交乎是夕生篝燈禪堂

披簡孤坐忽聞扣門聲且曰君所願交者來矣啟局而迎
則晝所見之判官也始頗疑懼纔稍欵洽坐談之頃溫語
莊言纏纏動聽生且喜得佳友由是定更輒來夜分而去
率以爲常生久之與習因自陳輒軻有年莫測榮枯所詣
乞其揲示冥册神顰蹙曰君無顯秩卽一芹猶難擷也奈
何生不覺憤惄堅請爲之廻斡神徐曰當爲君圖之閻數
夕至曰已得之矣山東某邑有與君同姓者應於明年入
泮吾互易其籍可暫得志然事久必露君其慎之嗣後神
不復見生亦歸里試果獲售悉如神言浮沉譽宮十餘載
忽夢神倉皇前訴曰吾與君一日之契潛竄冥錄巴蒙

帝謹法當遠戍茲行興君永別耳生覺而憫然未幾亦以

劣劣被黜

虞初新志豫
龜鈕玉樵作

邑西北凡家集有文昌閣被黃水冲頽帝像露處凋敝不堪一日暑雨驟至村中有啞童子以賣角黍爲業過而心憐之以葦席蔽帝身夜夢一道者以針探其喉及晨遂能言乃重新其閣李巡按爲記其異

呂氏懷清
堂雜記

永邑鄉村多種桑蠶成婦孺拈絲織紬名曰土綢堅白異常漢書云睢渙之水出文章宗廟黻黼衣裳用焉取其質堅而緩年久不敝也魏武帝云聲價當在蜀錦吳綾之上前明織造局遣烏材至亳州采辦充貢染成朱紫色尤鮮

以作宮眷之用今罷貢

同上

永城棗乾亦名貢乾一名棗脯一名白棗縣志均未載其始末造法以平刀刮其皮以圓刀剗其核晒七八日貯之器中名曰晒乾可羹食又用炭火支炕烘三晝夜名曰炕乾生食爲佳明宏治宣德時張皇后攜至官中遂以入貢每歲按集派充正貢六百觔隨貢一千觔每觔折錢四五百不等戶民苦之咸同間皖匪研伐棗樹殆盡撫臣張奏請優免奉旨致祭天壇必需之貢未允

同上

秋間有草蟲善鳴其名絡緯河南人呼爲蚰子取其子以油煎食之云其味甚美余不敢嘗也詩云嚙嚙草蟲卽此

京都人以牛肉雜豆腐食之卽能至冬

汪介人中
州雜俎

梁宋之間每至初春挑野菜食之根及苗香脆而微苦名
苣菜初不能解其字余詫以爲美而僕人言江南偏地有
之但不食耳卽所云苦菜也按月令四月苦菜秀今人多
不審其的爲何物考神農本草一名茶草一名游冬凌冬
不死詩云誰謂荼苦又莖茶如飴爾雅苦菜是也俗作薺
兒菜又名野苦賣又顏氏家訓引易通卦驗元圖云苦菜
生於寒秋經冬歷春乃成一名游冬菜似苦苣而細斷之
有白汁花白似菊然則宋梁所食者卽茶也土人呼爲苣
苣想以其形似苦苣字从苣無疑

同上

八大山人明寧藩宗室。人屋人屋廣廈萬間之意也。穎異絕倫八歲能詩善書畫。甲申國變後如喑啞棄家爲僧。又號雪个。未幾病顛初伏地嗚咽已而仰天大笑笑已則哭。人醉之酒則顛止更號曰个山。又號曰驢。又號曰八大。山人八大者四方四隅皆我爲大而無人於我也。傲游天下無定方。順治初寄居李巡按家數年不知所終。虞初新志

香祖樓者練公子藏嬌之所也。蔣心餘演之。叙其艷婉之情離奇之狀使人欣羨不已。題咏極多。蔣若生九種曲

永城典史署有老樹一株。年久枯朽尉召工匠伐之。剗腹則山水花鳥儼如圖畫。人爭寶之。鉏玉樵物觚。

理先生鬯和字卿雲號寒石明季西華人初姓李恥與李
自成同姓改爲理少孤力學師事縣人胡然以白沙爲示
崇貞舉人贊南浙江兵務薦爲兵部職方郎虔州亂死焉
著赤城解詩文集長子習慷慨有勇略善左右射從先生
南渡遇海寇矢無虛發福王以軍功授副將改巡河先生
卒奉其祖母以歸後以統兵擊土寇歿於永城葬焉

西華

原书缺页

原书缺页

捐資姓氏

候選知府調補祥符縣永城縣知縣岳廷楷捐銀貳兩
二品銜記名簡欽道廣東惠州府前永城縣知縣沈傳義捐銀壹佰兩
署懷慶府事前永城縣知縣傅樞捐銀伍拾兩

署杞縣事前永城縣知縣邵華林

捐銀叁拾兩

太 邱 書 院

捐銀壹百三拾兩

二品銜四品卿候選道篤實堂呂永輝

捐銀壹佰兩

候選訓導李伯海軍功李永春等

耆英捐銀三拾兩

邑 庐 生 張 煒

耆英捐銀三拾兩

候 選 訓 導 劉 敏 齋

耆英捐銀肆拾兩

直隸河間府知府丁象震

捐銀貳拾兩

從九品心道樓子錫瑪

老榮捐銀壹拾兩

同和興典壽州候選藍知事謝先恭

捐銀五拾兩

江蘇巡檢成省堂

老榮捐銀貳拾兩